

文苑  
方技

兩浙名賢錄

二十四



兩浙名賢錄卷四十七目次

文苑

明

漫吟先生金仲孚信

子聲附

布政使陳博文約

弟綱釋附

吳文可景奎

夏義甫

劉佐張羽周倬沈貫附

唐處敬肅

子之淳蔡庸毛鉉附

鶴岩先生楊仲彰芾

子獻敬附

草澤閒民劉坦之履

監察御史黃叔賜昶

守黑子夏中甫時

弟中孚中擘附

教讀平仲微顯

子宣附

永新令烏繼善斯道

子熙附

國子助教趙本初俶



鄭教授本中

子復言 雍言附

長史瞿宗吉佑

清節先生王用賓賓

白衣巡撫汪陽復一初

按察僉事時季照銘

滄江散人徐方舟舫

教授凌彥翀雲翰

黃思銘

馬浩瀾洪

王修德

郭士淵附

王百源淮

湯胤績 張楷附

祝蕪州宗善

給事中許廷慎伯旅

檢討周維翰翰

吳琬

葉維新銘臻

斗南先生胡虛白奎

沐陽尉周伯器鼎

大理少卿楊復

蕪秉衡平

弟正附

司經正字顧存誠慤

岑瑩附

禮部主事王希範洪

大理寺卿夏季爵時正

劉士亨泰

進士張廷珮琦

禮部尚書倪克讓謙

監察御史姚公綬綬

劉邦彥英

趙廷玉 霍孟 賜俞鳴玉附

兵部主事羅邦彥信佳

子縉附

石城訓導魏達卿偁

籀冠道人徐延之伯齡

司理戴孟常經

弟綸附

稼翁洪唯卿貫

父性附

司訓沈明德宣

郡司馬周天雨澤

劉季俊杰



翰林院修撰錢與謙福

文學董子壬淞

莫仲璵璠

吳文英驥

參議吳維新鼎

太常卿吳仁甫惠

陳用明鑑

文學郎仁寶瑛

桂林守華仁卿愛

朱元素朴

沈用之賓國

提學副使陸舉之鈺

施進士侃

孝廉沈士明燦

弟炤子  
士立附

翰林編修王懋賢相

尚寶卿戚希仲元佐

諭德姚維東涑

大理寺卿沈邃伯玄華

文介先生支心易大綸

工部侍郎蔡子木汝楠

同知范孔嘉言

彭輅附

沈懋學仕

孝廉王茂成養端

陳山人霍

項子瞻元淇

弟元  
汴附

田督學汝成

按察僉事楊汝承祐

江西布政徐子與中行

徐文長渭

翰林院修撰沈懋孝

方太守九敘

袁州司理徐茂吳桂

太學茅樾延翁積

參議吳明卿國倫

贈工部郎中沈澄夫涑

子附



光祿署正卓徵甫明卿 東臯子殷方叔仲春

吳少君孺子

兩浙名賢錄卷四十七目次終

兩浙名賢錄卷之四十七

東海徐象梅仲和氏撰

當湖呂澹巨源氏閱

文苑

明 共百十二人

漫吟先生金仲孚信 子聲附

金信字仲孚，金華人。穎悟攻詩。從楊維禎游，往來吳越間。每至山水佳絕處，輒吟嘯終日。詩瓢為浦部使者以茂才舉，不應。歸隱金華之優游洞，以詩自娛。學者稱為



漫吟先生有春草軒集傳於世子聲字伯鏞亦能詩與  
袁仲仁陳大有輩皆以風流儒雅能詩聞於時號十才  
子云

山西布政使陳博文約弟綱繹緝附

陳約字博文嘉興人貫綜百氏以能詩名弟三人綱字  
簡文繹字思文緝字熙文以家學切磨善言名理間為  
詩歌友于唱和如埴篔簹然而綱尤有聲元季之亂放情  
湖海與楊廉夫顧仲瑛輩以詩賡唱有竹林集約應聘  
官大理卿終山西布政使

吳文可景奎

吳景奎字文可金華人酷好為詩常游山澤間方苦吟  
而雨至雨濡其衣弗知也其所著集曰葯房樵唱宋濂  
為之序曰公以雄逸之資濟通明之識著於篇翰規倣  
風雅鼓動江山之氣發揮造化之微味玄酒於周庭襲  
懸藜於梁苑雕龍綵鳳不足為之麗衝飈激浪不足為  
之豪其悽惋也則孤猿夜號松露初滴其雅馴也則冠  
冕佩玉儼趨廟廊由其才無不兼故體無不備讀之者  
如入玄圃而攬明月木難之珍如登崑丘而覩天禾肉



芝之貴誠可謂擅名作者之林，競爽稅文之場者矣。其為名家所稱許如此。

夏義甫

劉佐張羽周倬沈貫附

夏義甫，鄆南人。少以孝行稱。博學好古。值勝國兵亂，築室天目，杜門隱居者四十年。與劉佐、張羽、周倬、沈貫諸君子相為師友。每有得，輒為吟嘯。又善繪，嘗作天目山房圖。筆墨簡澹，力追作者。至今寶之。

唐處敬肅

子之淳蔡庸毛鉉附

唐肅，字處敬，山陰人。洪武初，召至京師，纂修禮學，尋擢應奉翰林文字。眷注隆重，已而罷歸。卒。肅博學工文辭，與姑蘓高季迪、楊孟載並稱於時。所著有丹崖集。子之淳，字愚士，潛心著述。同時蔡庸、毛鉉、錙，績俱有詩名。而之淳為稱首。以方孝儒薦，官翰林侍講。嘗集古今治亂為書，將獻之，不果而卒。所著有毅齋萍居二集及文斷十卷。

鶴岩先生楊仲彰芾

子獻敬附

楊芾，字仲彰，東陽人。性穎悟，刻志於學。早從陳樵游，復登黃潛之門。文辭典雅，操筆立就。二公皆愛推焉。洪武



初聘爲義烏學官。膺薦上京。辭歸杜門。益以著述爲事。所著詩文有百一稿。無逸齋稿。又輯元詩爲正聲類編。總若干卷。學者稱鶴岩先生。子璵。璵俱能詩。璵嘗補金華賢達傳。爲士林所稱。

草澤閒民劉坦之履

劉履字坦之。上虞人。少貧力學。有詩名。至正末。避亂太平山。自號草澤閒民。洪武初。被召至京。卒於會同館。嘗做朱子傳註補註選詩爲風雅翼十四卷。行於世。

監察御史黃叔暘昶

黃昶字叔暘。義烏文獻公潛之曾孫也。受業宋景濂之門。能古文辭。以春秋領鄉薦。肄業成均。時纂修大明日曆。詔選天下俊彥有文者二人。考義繕書。昶居一焉。昶見上西苑。慰問良久。且曰。爾何人之裔。宋濂對曰。文獻公潛昶曾祖也。上悅。遣侍臣出上方綺裘革履以賜之。學士承旨詹同偕宋濂侍。上燕同被酒而還。愛昶有逸才。賦詩贈之。聞於上。上卽和。同詩命宋濂書之。以賜昶。朝士以爲榮。未幾。任王府伴讀。三年歸省。宋濂賦詩十四章送之。起拜監察御史。卒。



守黑子夏中甫時

弟中孚中擘附

夏時字中甫上虞人博學善屬文已而失明自號守黑子與二弟中孚中擘唱和爲文一篇成輒命筆之次而成編曰守黑稿

教讀平仲微顯

子宣附

平顯字仲微仁和人博學多聞風流蘊藉詩文皆有典則書法深穩可尚黔國沐公重其才辟爲教讀卒所著有松雨齋集子宣亦能詩仕終蒙化府通判

錙孟熙績

子師邵附

錙績字孟熙山陰人少負才氣無所不學善屬文尤工於詩詞樂府與同郡蔡庸毛鉉唐之淳相友善並有文名時稱唐錙毛蔡績所著有詩律霏雪嵩陽集穿雲集合數十卷子師邵亦善屬文所著有盧胡紀遊諸稿

永新令烏繼善斯道

子熙附

烏斯道字繼善慈溪人文尚體要尤長於詩典寄高遠而清灑出塵一掃元人過巧之弊宋景濂嘗評之云斯道之作峻潔如明月珠洶湧如春江濤其賞鑒於名流有如此尤精書法小楷行草各臻其妙遠近求之屢常



文苑 卷之四  
滿戶國初用薦起爲永新令有惠政以疾去官民遮留  
不可得爲立祠祀之所著有秋吟稿春草齋集子熙字  
緝之亦以詩文擅名

國子助教趙本初倣  
趙倣字本初山陰人宋宗室也八歲能詩文指物輒賦  
稍長博涉經史爲文逼秦漢賦尤擅美部使者河中何  
約按部至越聞倣名延見之從容問諸史倣矢口而談  
上下三千年君臣行事至於夷狄山川形勢如其身所  
履者約歎曰窮年讀史不如聽趙生半日談尋登進士

時方右武儒者絀不用遂隱居明興徵拜國子助教是  
時典成均者皆極殊選而倣與蘓伯衡爲冠弁云

鄭教授本忠

子復言雍言附

鄭本忠字本忠少篤學攻伏氏書鄞人元季方氏據浙  
東三郡擅爵祿人本忠義不食其粟杜門不仕益務記  
覽涵濡停畜爲文必中矩度國初舉明經不起未幾以  
薦授昌國訓導遷秦府教授卒於官所著有安分集子  
二復言雍言復言舉永樂丙戌進士選翰林庶吉士讀  
中秘書預修永樂大典應制賦白鹿詩稱旨授禮部主



事陞員外郎以太僕少卿致仕雍言舉乙未進士亦改庶吉士授中書舍人仁宗監國屢命賦詩頃刻立就尋命署禮部尚寶司及六科事陞河南按察僉事宣宗御極雅重其名留直文華殿日備顧問特賜給事牙牌以便出入陞太常少卿兄弟友恭無媿家學人稱二難云

長史瞿宗吉佑

瞿佑字宗吉錢塘人學博才瞻風致俊朗年十四鄉人張彥復命賦雜詩美甚遂知名楊庶夫稱之爲千里駒

洪武中以薦授仁和訓導轉臨安教諭陞周府右長史師道振舉輔弼有法永樂間以詩禍編管保安久之釋歸復原職內閣辦事年八十七卒所著有春秋貫珠詩經正葩閱史管見鼓吹續音存齋詩集行於世

清節先生王用賓賓

王賓字用賓鄞人少卓犖不羣甫長博學強記貫穿經史百家避地村疇澹然自適號水村隱者洪武六年舉茂才以母老不起既終養復以文學薦授休寧教諭身率諸生屹屹忘寢食士不懲而勸秩滿考績廷試鍾山



文苑 卷之四  
雨霽詩及參鶴賦。上奇之。命供奉翰林。以老辭。教授溇陽。卒。門人私謚曰清節先生。所著有書隱西上南遊等集。

白衣巡撫汪陽復一初

汪一初字陽復。淳安人。少嗜學。以詩文鳴。洪武庚子。守將薦之朝。上方觀書。命作詩立賦一絕。以進。有花影上階春滿地。讀書餘暇問蒼生之句。卽命以白衣侍講。踰月。授儒學提舉。明年。以親老乞歸養。庚申。復召見對策第一。擢太常寺卿。辭不就。遂命白衣巡撫山西。卒於潁州。上聞嗟悼。賜祭。以柩歸葬焉。

按察僉事時季照銘

時銘字季照。以字行。慈谿人。少機敏。好學。能詩。及冠。漁獵經史。未嘗釋手。爲文奇正。間出變化。不窮。希古作者。洪武二十九年。鄞學請職訓導。已而赴京。和御製思得人詩。上獎諭。凡兩召對。特授監察御史。鞠讞平恕。未嘗輕附爰書。以疾還里。未幾。復用薦。爲崇仁令。三考稱職。陞四川按察司僉事。風裁益振。嘗夢一蒼顏縞衣人。手授以墨。自是文思益進。因號所著詩文爲夢墨稿。



滄江散人徐方舟舫

徐舫字方舟桐廬人博學能文尤工於詩少與青田劉基游洪武初基被徵過桐廬邀之同行舫荷簑笠以見示無仕進意因共縱酒歌詩而別築室江臯日吟哦於雲烟出沒間翛然若與世隔因自號曰滄江散人天大雪獨泛舟釣江中戀戀終日不忍捨去見者疑其非世間人及卒宋景濂銘其墓稱其詩曰圓熟璀璨如明珠走盤而玉色交映非虛美也所著有滄江集

教授凌彥翀雲翰

凌雲翰字彥翀仁和人博通經史工於詞章領至正十九年鄉薦除平江路學正不赴閉門讀書以文翰自適嘗作梅詞霜天曉角一百首柳詞柳稍青一百首號梅柳爭春韻調雙美洪武初舉杭州府學訓導陞成都府學教授卒所著有柘軒集

黃思銘

黃思銘象山人身不勝衣而倜儻好讀書問學克裕詩章清麗纖美無山林枯槁之態得唐人標格性復恬退不嗜榮祿洪武初累膺人材明經之聘卒不赴所著有



東谷詩集方正學深許之

馬浩瀾洪

馬洪字浩瀾錢塘人以辭賦擅名東南清修苦節開門授徒以給養親之費皓首韋布而含珠吐玉聲價益重所交皆一時名士每過從出游衣冠雜集車從都雅洪獨葛巾草履高步其間人望之昂然若野雀之在雞羣也詩有大曆以還風致其詞調尤極妍麗每一篇出人爭持稿以去不甚惜故亦不甚傳

王修德

郭士淵附

王修德寧海人與郭士淵皆以文名初太史宋景濂見方遜志之文歎曰真奇才也遂留左右不忍舍去既見修德士淵之文喟然曰吾道台矣林公輔嘗因景濂之言而評之以為遜志之文如春氣方至津液之色克滿廣宇飛潛動植各有生態士淵之文如蒼鵠摩空飛縱東西初無定適而俊逸之氣自為人所畏修德之文如月落澄江上下一色淨絕垢氛而清明之氣可掬當時以為善評

王百源淮

湯胤績張楷附



王淮字百源，慈谿人。長身美髯，儀觀秀整，博極羣書。考索詳密，湯錦衣胤績亦以博覽善辯名。嘗遇於湖之慈感寺，對語移日不相下。及語青陵臺事，淮曰：青陵臺有三，而胤績祇得其二。淮歷歷口誦，無所遺。胤績歎服。他日謂知府岳璿曰：百源行秘書也。淮平生好作長歌，下筆輒數十韻，造語奇麗，擅名江湖間。同邑張楷嘗以詩贈之，有長驅文陣衝韓壁，高立詩標上李壇之句。年八十而卒。所著有大愧稿，藏於家。

祝蘓州宗善

祝宗善，江山人。博學能詩。洪武間舉文學，爲邑庠教諭。秩滿之京，館雞鳴僧舍。一日客有微服倚闌吟者，韻未竟，宗善長揖續之，客駭問其名而去。翌日傳手詔召見，擢知蘓州府。始知微服倚闌者，太祖也。宗善守廉介，以詩文擅名。後坐誣籍其家，唯圖籍數卷而已。卒復其官。

給事中許廷慎伯旅

許伯旅，字廷慎，黃岩人。洪武初爲刑科給事中，以詩名。時稱爲許小杜。林公輔嘗觀其感興諸詩，問其得何法。



而然。廷慎曰：法可言也，法之意不可言也。上士用法，得法之意，中士守法，得法之似，吾詩幾用法矣。識者以爲不妄。

檢討周維翰翰

周翰，字維翰，鄞人。永樂三年，中浙江鄉試，明年會車駕臨太學，獻賦稱旨，詔禮部所選副榜士，就廷覆試，擢翰第一，命進學翰林，預修永樂大典。七年，除翰林典籍，秩滿陞檢討，預修兩朝實錄，簡牘浩繁，翰殫心窮力，書垂成而病，病既劇，猶問史成何如，言不及他事而卒。翰爲文，根柢班馬，出入韓柳、歐蘇，下筆頃刻千百言，當時稱文中之豪，有集若干卷，藏於家。

吳琬

吳琬，長興人，勵志讀書，不屑舉業，築室董塢山，與安仁、劉麟、金陵龍霓、關西孫一元、歸安陸崑結社，湖南稱吳興五隱。郡守劉天和每有請質，必造其廬，琬精邵子皇極數，博極羣書，所著有三才廣志三百卷、史類六百卷，藏於家。

葉維新銘臻



葉銘臻字維新慈谿人永樂甲申進士少以文名詩得盛唐風格每爲舉主解學士縉所稱賞時韓王有梁園之賢一見悅之遂請爲伴讀王改國於涼懇歸得允與祭酒陳敬宗齊名鄭瑤來守郡造廬求見時銘臻杜門已久謝不出瑤曰來求作府堂記耳何拒之深也乃出見惟如平生延至郡齋援筆爲記鄭歎服立碑堂隅其居家動遵禮度不威自肅士大夫語家法之善者以爲稱首所著有詩集二卷若家集三卷

斗南先生胡虛白奎

胡奎字虛白海寧人博貫經史尤長於詩以寧國薦爲府教授嘗過望湖亭和東坡詩書於壁間有老人觀之曰六百年來無此詩矣君非斗南先生邪言訖忽不見故人稱爲斗南先生

沐陽尉周伯器鼎

周鼎字伯器嘉善人少警敏書一覽輒成誦旣長以文學知名時有尚書金公帥兵南征聞寇過嘉興鼎以布衣謁見金與語大奇之辟置幕府預參籌畫號令文符皆主之未幾寇平當以功上會金與他使者不協抑授



沐陽縣尉適淮民飢奏請賑濟復忤當道意遂罷歸  
 為文嚴整峭厲援筆立就尤工於詩浙西文士淵藪猶  
 推鼎絕句為江南獨步一時學者多宗之所著有土苴  
 集十卷行於世

大理少卿楊復

楊復長興人刻苦問學善古文辭力還古雅不修蒸績  
 玄言空部無不研解嘗日抄唐韻數過得字義之精永  
 樂初浙江鄉試第一四年丙戌成進士拜監察御史累  
 遷大理少卿決獄無冤人以比之于公所著有土苴集

五十卷

蘓秉衡平 弟正附

蘓平字秉衡海昌人性穎悟意氣踈傲幼時有詠繡鞋  
 詩膾炙人口時稱蘓繡鞋永樂間以賢良方正薦不就  
 放情山水間所著有雪溪詩集弟正字秉直工詩文篤  
 志學問與兄遨遊名士間時稱吳下才子而平正兄  
 弟與焉張楷式之寄詩有云浙詩門逕未荒蕪獨賴  
 除有二蘓其推如此所著有雲壑集其門人張寧為作

碑記



司經正字顧存誠慤

岑瑩附

顧慤字存誠，司諫道之子也。少聰警於書，無所不讀，以文自雄，空視四海。仁宗皇帝俯念司諫舊德，詢其後尚書蹇義，以慤對詔起之，挾裝北上。路出藩省，進謁慤野服拜堂下，省臣不與均禮。慤起立不拜，抗聲曰：「朝廷起予，非庶人役於官者，公等不為禮，慤何敢僕僕自卑。省臣訝其言，意其中未必有也。指所坐廳事曰：「堂名紫薇，能記之否？」趨具楮墨，令面為之。慤從容就席，展紙濡毫，頃刻立就。文不更草，書體數家俱備。眾皆歎曰：「奇才也。」以上客禮之。陛見，擢司經正字。聲譽日起，然性素抗直，不能隨時俯仰。欲因事引退，幼喪母，鞠於祖母。弟趙中和氏值中和沒，陳情乞歸，為之哀忌者，劾以非禮。謫戍南丹。在戍發為詩章，幽憂覃思，有柳柳州之情。卒年二十九，有克然子集，舜江岑瑩重其交義，不遠萬里，函其遺骨，置諸枕中，歸葬焉。

禮部主事王希範洪

王洪字希範，錢塘人。自幼岐嶷英異，越人以童子廩郡庠，大為同業生所畏讓。嘗從長者游，輒口占詩曰：「跣足



拾紫芝拂衣坐芳草。嗤彼塵埃人。蠅營爲誰老。時杭郡  
博胡粹中。一聞器異之。授以春秋日記數萬言。操觚立  
就。十七領鄉薦。明年成進士。授行人。膺薦擢吏科給事  
中。尋轉翰林檢討。修大典。爲副總裁。尋陞修撰。兼侍講。  
時上以文學招延天下之士。而四方貢獻日尋不絕。  
如麒麟白澤玄兔騶虞芝草醴泉頌歌賦辭之作。率以  
命洪文學之。臣方病苦於考索。問奇者趾相錯。而洪應  
答如注。一時諸老前輩咸撝遜折節下之。方洪之爲副  
總裁也。秉筆者位在洪上。每事任決取舍。衆莫敢逆。唯  
洪持正不阿。至欲載其家乘。瑞應之徵。洪力言於上。  
以爲不可。取信於天下。後世緣是見忌。居二年。遷禮部  
主事。會大宗伯奉勅巡行關陝。凡部事悉命洪敷奏。論  
事詳明。上心竒之。方屬意重用。而竟以末疾不起。年  
僅四十有二。上痛惜之。故其疾也。得賜藥物。其卒也。  
復得賜棺。且給舟歸其喪。皆異數也。洪雖負高才乎。然  
持志甚卑。而獨抗立朝之節。凡朝廷大制作大建議。未  
嘗輕徇時好。一時視爲重輕。使天假以年。則其施設制  
作。必有大過人者。負才志而不大盡用焉。命也。奈何。所



著有毅齋詩文集八卷行於世

大理寺卿夏季爵時正

夏時正字季爵慈谿人操履端潔不尚依違博學強記通經史百家文思紆鬱詩逼盛唐書迹亦道勁有法登正統進士第授刑部主事歷官至大理寺卿恭履不苟簡知當宁時遣十二使行天下考察官吏臧否皆選廷臣位高望重者時正分隸江西一時墨吏素畏威名皆望風解去而狡黠懷怨者騰飛語聞於上嘗所黜非公時正遂自劾請老其父與誠嘗居杭之仁和有田在橫水間時正就居之杜門讀書足跡不入城市營巢居閣於孤山時往憇焉凭闌送目屏絕世慮泊如也晚歲文益工人得之若拱璧藩臬諸公欲見不得每就咨焉平生大節高行如龍驤鳳舉爲人所追仰所著有餘留稿太常志三禮儀略舉要各十卷杭州府志六十三卷禹貢詳節一卷葉文莊獨雅愛其爲文以爲如春蠶簇繭秋鶴引吭云

劉士亨泰

劉泰字士亨錢塘人負奇志特立不羣景泰天順間隱



居武林山中好學篤行肆其餘力於詩精麗奇偉爲一時絕唱每一篇出則競相傳誦南北之士來客江左者歸必得泰一詩以取重鄉里否則雖金珠滿橐不足誇詡也風雪中蕭然環堵人不能堪泰吟咏自得無幾微憂愁抑鬱之意其高尚固不在袁邵公下所著有菊庄晚香雪餘唱和諸集

進士張廷珩琦

張琦字廷珩更字宋卿慈谿人天資穎異讀書一二過輒終身不忘作文有俊才自州角入庠校負其才氣旁

若無人前輩亦畏憚之正統辛酉中浙江鄉試時猶未冠也及試禮部屢不售益自奮於學文氣浩瀚如峽江春流不可抵禦時海鹽張寧餘姚魏瀚嘉興姚綬俱有才名人稱浙江四才子天順丁丑始登甲第未幾以疾卒

禮部尚書倪克讓謙

倪謙字克讓其先錢塘人洪武初徙實京師占籍應天之上元生有異質雙目炯然如電體有四乳性極穎敏書一經目輒不忘領正統戊午鄉薦明年賜進士及第



第一甲三人拜翰林院編修入闕中秘書已奉使朝鮮遠人一覩丰采竦然歎服時有所作卽席揮洒略不經意莫不縮頸吐舌驚以爲神景泰間直文華殿應制賦詩中官立埃以進天順初累遷至學士簡侍憲廟於春官日進講讀多所啓沃己卯主考順天鄉試斥黜權憲之子遂誣構以罪論戍開平在謫四年悠然以詩酒自娛邊人愛慕如奉所親士子及門授經者多所造就憲廟踐祚詔復原官尋與子岳同日奉命入史局纂修英廟實錄時以爲榮進禮部右侍郎轉南京禮部進尚書乞致仕卒贈太子少保謚文僖謙平生德量寬洪與物無競喜獎拔後進聞人一善若已有之博覽載籍宏中肆外人莫能及而勤敏嗜學至老不衰人以比衛武公所著有玉堂稿百卷上谷稿八卷歸田稿四十二卷南宮稿二十卷遠海編四卷藏於家

監察御史姚公綬綬

姚綬字公綬嘉興人少工古文辭天順中第進士爲監察御史巡鹽兩淮鈎剔積弊淮飢畫策賑濟流民賴以全活璽書褒美未幾出知永寧以母老辭歸作滄江虹



月舟遊泛甚適書畫妙絕一時詩文暢逸所著有大易

天人合旨及雜集若干卷

劉邦彥英

趙廷玉霍孟暘俞鳴玉附

劉英字邦彥錢塘人自幼篤學操行高潔其為詩清奇

俊逸條然出塵當天順成化間隱居不佳與劉士亨趙

廷玉霍孟暘俞鳴玉結社賦詩英長篇短章備極工巧

名振一時

兵部主事羅邦彥信佳

子縉附

羅信佳字邦彥慈谿人少有異質嘗與同邑桂琛鄭岑

馮璋時中讀書永明僧舍其四人者講讀窮晝夜一燈

聚首每至夜分信佳獨斲睡達旦及舉所讀信佳背誦

如流至講解經傳四人紛紜未定而信佳卧其旁以一

言決之景泰庚午與四人同領鄉書大理卿夏時正題

其讀書處曰聚奎堂為文記之成化丙戌登進士第除

南京兵部主事未幾卒其文字簡嚴人謂其似李太白

為人和易未嘗以才自矜位不滿德人咸惜之子縉亦

舉進士官至監察御史

石城訓導魏達卿備



魏偁字達卿，慈谿人。由郡庠生貢於春官，廷試第一。授石城訓導，自幼穎慧，讀書日記數千言，稍長博極羣書，以文雄於世，為詩希盛唐風格，典雅不凡，恒以立言自許。時與學士楊守陳兄弟相和答，甚器重之。偁天性孝友，動師聖賢，平生不見疾言遽色，與人交溫厚，樂易至，利誘勢惕則屹然山立，不可動搖。其教石城，以身為範，學者宗焉。所著有經書僅悟、覈克子茶餘詩話、聞見類纂、小史、雲林詩略、讀史編、釋冠道人徐延之伯齡。

徐伯齡字延之，錢塘人，號籜冠道人。博學彊記，洞曉音律，尤工樂府。嘗雜集鼙、鼙、甌數十枚，考其音之中律者，奏曲一章，俄頃而協。所著有蟬精集二十卷。

司理戴孟常經 弟綸附

戴經字孟常，嘉興人，御史祐之子也。攻苦問學，以能文稱。成化丙午舉於鄉，歷延平、九江二郡司理，居官執法，甘澹泊，歷任六載，獨處官署，未嘗以家累自隨。公退即垂簾著書，陞泰安知州，致仕家居，益肆力學問。文益工，所著有潯陽餘稿、雙湖集行世。秀水前未有志，志自經。



始其弟綸癸丑進士

稼翁洪唯卿貫

父性附

洪貫字唯卿，鄞人。處士性之子。性素博學，有文章，擅詩賦，爲一時名公鉅卿推重。貫少受性易學，舉成化丁酉鄉試，除教鄧州，益復肆力爲古文辭。陞知從化，復改政和。政和有紫陽西山遺跡，貫因表章發揮，以經學風勵多士。士彬彬起，然竟不進，得下考歸。因擬少陵秋興八首，以見志。晚結廬東野，更號稼翁。日哦，其間取唐人詩和之。殆徧好事者，爭傳之。或丐銘志譜牒，以爲重。海寧新城江陰靖江四邑志，皆其手筆也。年九十卒。時猶不忘。搗翰詩文流傳人間。有周易解疑、卧遊清嘯錄、太白山人稿五十餘卷。

司訓沈明德宣

沈宣字明德，仁和人。由歲貢官安慶府學訓導。天資明敏，銳意攻古文辭，尤長於詩。下筆立就，多驚人語。晚節好画山水，多興致，頗自珍。不輕點筆，世亦以此珍之。

郡司馬周天雨澤

周澤字天雨，嘉善人。博學有才，爲文清婉。詩亦工緻。雖



不多作。每一言出。人競膾炙之。成化癸卯。領浙江鄉薦。第一登進士第。調襄陽府推官。三年。獄無冤滯。陞福州府同知。尋轉贛州卒。

劉季俊杰

劉杰字季俊。海鹽人。幼穎敏。讀書過目輒成誦。初學禮於許伯金。復受尚書於邵宏譽。經明不售。遂弃去。專意學古。通聲律。書數。長於詩文。成化改元。徵杰修實錄。晚年著作煥然。德器淳雅。卓為鄉士。夫儀矩云。

翰林院修撰錢與謙福

錢福字與謙。其先本嘉興之桐鄉人。五世祖德明徙華亭。贅於西閩薄氏。高祖實出居放。崔灘。福因自號崔灘。福生而穎異。八歲能屬文。長益閎肆。凌駕今古。波瀾橫溢。鋒焰逼人。弱冠補博士弟子員。與顧清沈悅齊名。時稱三傑。福嘗遊小赤壁。對客放歌云。六丁拔出天地骨。一柱鎮壓吳江東。時人以為奇句。年二十六舉於鄉。三十魁省試。及奉廷對。賜進士第一人。福幼時病劇。其父夢人語曰。爾子吳寬也。時吳文定尚家。食後連舉省殿。二元。至是乃應松人在國朝未有第狀元者。有之自福。



始授翰林院修撰。三年告歸。又四年以大計罷。又七年而終。初福之在告也。放意山水。益肆力爲文藻。出入徽纒。維志所適。遠近購請。廷扣響答。殆無虛日。每廣坐間。羣客競請各用幅楮爲起居。酌酢交錯。不廢諧謔。以其隙。遞續之。比酒罷。無弗就者。當是時。福名滿天下。從者如雲。雖宿學通人。莫不避席相遜。而福亦意氣豪悍。若無足當者。居邸中。日飲亡何。當其醉後。衝口恣吻。時或逆人同列。皆不堪。以故得謗。卒於不振。然其中心隱厚。有人所不及者。方請急歸。抵滸墅關。時權稅郎他出。福艤舟三日。從者怏怏。欲自啓關鑰。福不可。曰。必需郎至。郎乃命吏逆。郎是逆。天子也。已。郎至。大爲媿謝。頗厚其酒資。以酬福。福却之。曰。不佞豈爲褻。蹄止哉。其居家。遇郡邑守相。落落不加禮。太守劉琬頗憎之。嘗語人曰。此白眼兒。奈何負一第。而不置我輩。曠間也。獨無急我時耶。福不顧。而守偶以事捷丞。丞患甚。已而丞失官。疑守也。誣守受贓千金。部使者入其言。幾露章矣。然守實廉節。方介人也。福聞之。操一舟至吳門。力爲守明。其無它。部使者乃釋守。福亦不言。會守謁謝使者。使者好語。



慰曰。知君有胡威之清。非錢太史幾負吾賢守矣。守退而大息曰。不意士大夫之踈我者。而援我乎。已守歸。欲睨福而福踈守如故。初福之與計偕也。謁李西涯相公。適有以司馬溫公像求李贊者。李卽以命福。福援筆立就。中有拔茅連茹公之在朝。青苗變法公之在野。公之在位。是爲元祐公之云亡。是爲靖康。李大加稱賞。以爲數語該括宋家治亂殆盡。爲之延譽於謝文肅公。曰。此掄魁才也。已而禮闈廷對。果占首選。

文學董子壬淞

董淞字子壬。海寧之錢山人。董故饒於貲。子壬生而穎異。以志自雄。猥視家產。夏然欲自別於富人。兒喜賑施。慕賢達。所交皆海內知名士。苟庸劣。雖富貴人。奴視之。加詬訕焉。人咸咎其迂。淞安之。不爲變。獨時時好讀書。世所傳書無不窺。尤好先秦西京。卑魏晉以下。不足學。時經義程文行天下。淞居校中。一簡不畜也。比舍生間示之。誦不一再行。則大笑弃去。曰。淺淺乎。兒侮聖訓。壯夫羞稱焉。有司課試。得淞文。誦不一再行。則大笑弃去。曰。怪哉。將安所置。是淞用是連試輒絀。弘治中以薦。應



敷陳王道獻若干萬言闕下。天子異之下禮部試會。要路人故淞所奴視之者沮之罷歸。既歸自顧生世弗。諸益放誕爲大言廣際天地幽極鬼神遠遡皇王近逮。古今名達罔不評刺或發之詩大篇短章多奧雅可誦。然家日落其好施日甚錢粟在側來求者色辭爲可憐。狀聽持去持去盡則又破產以施若不知有家然家人。交謫淞終自若以至喪明乃後已尸居齎食守黑閔光。沒齒無怨言因自號聽光大師喪明三年而卒卒年五。十有六所著有聖學全書真儒蓋語紫陽正脉并詩文。雜稿若干卷藏於家。

莫仲璵璠

莫璠字仲璵錢塘人隱居西湖與劉士亨爲詩酒友每。醉後擊鉢賡唱迭和得句卽高歌於烟水間嘗作讀史。三篇慨然慕謝安石文文山謝疊山之爲人義氣橫發。音節悲壯有古烈丈夫之風。

吳文英驥

吳驥字文英山陰人少敏慧博學洽聞才名籍甚工文。辭嘗作東山賦或以爲不下孫興公李文正東陽見驥。



所爲駱賓王廟碑，歎賞不置，稱爲文章宗匠。其志乘傳記率有體裁，好咨訪時事，評人物志行散逸，不能爲醇儒，而才美亦非諸儒所及。所著述頗富，而紹興先達傳最傳。

參議吳維新鼎

吳鼎，字維新，錢塘人。少慧嗜學，父母念獨子，重苦之，交禁弗爲止。卒以文章雄一時。正德中以進士釋褐，試吏尹臨淮，以異等薦，司風紀，不報時。武帝南巡，縣次續食中，貴道臨淮者，非索甚橫。鼎出身爲民，遂爲中貴所

誣，逮繫詔獄。廷議白鼎還原官，以薦擢南刑部主事，歷官廣西布政司參議，乞侍養，無何以病卒。年五十三。鼎起寒約，性鯁亮，力學自立，每危行不疑，以哆帽口不恤也。性好文，特甚。其爲臨淮罷劇，猶手一編，伊吾治當南北達路，過客時有中原文獻家博文邃古，諸名士大夫，鼎輒委已交，驩與相上下，其論旣謝，病屏居，益專力萃精，償其積志。六籍而下，九流諸子，策士春秋，先秦盛漢之誤，古金石竹簡之傳，旁逮外家雜說，譎誕怪迂之語，罔不雋飫醇酣。江左北朝以還，唐宋近代諸名家，亦皆



決籓入奧。神詣作者。故其文深涵。大放瞻蔚。宏肆能盡。達其所欲言。每一篇出。學者爭傳誦之。郡諸老先生。辯博能言者。自以爲弗及也。時有紀述。莫適自任。必推泉亭先生云。二子皆好學。能世其家。

太常卿吳仁甫惠

吳惠字仁甫。鄞人。少孤。隨其母育於異姓。備嘗荼苦。穎異過人。習記誦爲文章。卽越流輩。舉正德辛未進士。改翰林庶吉士。授檢討。轉國子司業。嘉靖初。天子方嚮用文學。惠侍經筵。日講多所啓沃。陞南京翰林侍講學士。歷官至太常寺卿。以病卒。惠自少熟蘓長公文。每濡毫染翰。酷相肖。大學士李東陽楊一清常以東坡稱之。惠亦以此高自矜許。或譏其不能進於道。惠亦復譏曰。經生學士如好古者。且就左氏司馬讀之。何暇及我。故其文卒自成一家。言有北川文集若干卷。

陳用明鑑

陳鑑字用明。海鹽人。性高亢。早舉業。弗習。日馳駿馬。蹴踘擊劍。有古豪俠風。或慮其終諷。曰。出事公卿。禮也。勸爲省臬掾。父兄允喜。爲入鑑。鑑曰。大丈夫不力學。何甘。



伏人下。弃弗就。遂閉門讀書。心弗擾紛。人罕見其面者。數年學遂成。至老不廢吟。篇章浩穰。金匄波激。卓然爲吟者之宗。詩凡萬餘首。總名之曰句溪集。

文學郎仁寶瑛

郎瑛字仁寶。仁和人。生有異質。少長從先生。長者游。有雋稱。選爲學生。博綜藝文。肆意探討。素有疾於進取。泊如也。有愛之者曰。如後時何。瑛曰。吾已委身載籍矣。當復與少年斷斷爭甲乙邪。因作脾對。以見志。督學使者惜其才。猶欲網羅推挽之。卒謝去。家所藏經籍諸史。文章雜家言甚盛。日危坐諷讀。其中攬要獵華。刺瑕指類。辨同異得失。著而爲書。曰青史衮鉞六十卷。七修類纂五十五卷。四方纓綬之士。見其書。無不願托交者。時奸黨之禁未除。瑛獨討革除遺事。作萃忠傳。以明靖難諸公之節。見者爲之咋舌。瑛不顧也。正德末。寧藩計始萌。芽衆謂不足慮。瑛獨以爲憂。及聞王文成在贛。喜曰。豎子不足平矣。已而果然。人始知瑛蓋有志當世而命不獲遇。卒以著述終也。惜哉。

桂林守華仁卿愛



華愛字仁卿，鄞人。甫成童，輒博識，強記。其苦於學，年二十二，舉於鄉。成甲戌進士，歷官職。方郎出守桂林，政績赫然，以抗直忤當路，投劾歸。日以詩書自娛。典至輒携其所知，夷猶於迴溪疊嶂之間。見雲蒸霧變，水秀草榮，欣然以詩文發之。精古書法，每臨池，池水盡黑。拈題叶韻，往往闖右丞少陵之藩而入。其室揆，辟吮墨之士，方翁然向風，而竟以不藥死。所著有石窻集若干卷，藏之家。

朱元素朴

朱朴，字元素，別號西村。海鹽人，博雅工詩，善畫，爲人澹嗜欲，體癯而修音聲琅琅，每一吟咏，能令鄙吝坐忘。力穡具餐暇，或弄笛月中，興至則吮墨寫山水，小圖懸壁間，締玩之。或作蠅頭小楷題詩，其上客有造者，請之去，無靳色。郡大夫高其名，懇致之，以疾辭。且曰：吾氓也，焉可與尊官抗禮。吾無他能，以益若治吾休矣。蓋時有官者多賤士，莫肯下賢。冥鴻之慕仙仙如也。王孝廉文祿以其趣與詩可方陶靖節，有西村集若干卷。

沈用之賓國



沈賓國字用之義烏人性英特博閱經史弱冠卽厭舉業攻古詩文嘗遊越謝文正遷一見之喜曰此今之長吉也爲詠雛鳥圖贈之爲詩多竒思不肯作尋常語所著有五經註疏太極圖衍皇極經世書疏文集若干卷提學副使陸舉之鈇

陸鈇字舉之副使偁季子也甫能言乳媪命之以字百試不爽稍長慧智開發一目輒數行下巳卯舉於鄉庚辰舉進士廷試第二拜翰林編修讀書中秘益銳志問學盡覽經史百家言尤砥礪名節以古人自期待預修

武皇實錄成進修撰以議禮忤秉樞遂出爲湖廣按察司僉事再轉遷山東按察副使職專學校敦本抑末諸士爲之易趨山東舊無通志歎曰海岱山川之宗也聖賢人物之望也六經文章之祖也惟茲一方之志而天下古今之事備焉吾當任茲役矣遂考古譌今補遺正訛窮日夕不懈比踰年志成而鈇告病矣上疏乞骸骨不報卒鈇性溫厚和而不流口未嘗言人之短而剖大之氣侃侃不阿犯履啗之戒曾無回忌卒坎塲以歿鈇於書無不讀爲文奧衍宏暢詩則溫醇而典婉畜而諷



有晉唐之風所著有少石子集十三卷藏於家

施進士侃

施侃歸安人舉嘉靖丙戌進士少穎悟博學自經史百家律曆醫卜兵家竒秘以及稗官野史無不該覽有得輒書於冊與人談古今如河懸以注滔滔不竭爲文雄渾詩有氣格著青山集若干卷行於世

孝廉沈士明燭

弟炤子士立附

沈燭字士明武塘之麟溪人弱冠舉於鄉卽以郭有首人倫東國自居父業好行其德燭每陰拓之凡一言一

行之善必稱自父出及父卒摧毀倍恒適島夷薄境空

邑走避燭獨號泣扶父柩冒鋒刃以葬室廬筐篋焚掠

俱盡不問也寇劇議築城以守兩弟當分役郡縣須一

言以免燭不肯曰此自爲閭黨生靈計吾家何可不效

奮甬爲父老子弟尋尺謀竟以身代之先後郡邑大夫

高其誼思一見不可得凡十上公車不復藉有司具行

李一切謝却曰曾無益於縣官顧煩公鎗爲長安游衍

費邪居家動遵古禮日闔戶手一編不輟與弟炤自相

師友詩文抽自理學佐以蘇韓不爲雕績書法適逸酷



似米南宮然不漫爲捉筆所至問竒履滿戶外苟非其人卽貴厭梁竇弗許也卒年五十九所著有石聯遺稿行于世子士立亦能詩尤工書法人以此米氏虎兒

翰林編修王懋賢相

王相字懋賢鄞人生而穎慧絕倫少受蒙學輒奮勵誦習昕夕不懈稍長沉酣經典鈞稽史氏而力殫於淵學吐英摘華樹聲秣林嘗讀書高錢山中每夜灼一燈琅琅誦不休飢則拾蹲鴟火而啖之或申旦不寐隣傭厭苦之竊議曰何物豎儒欲以是博官邪聞之迄不變正

德舉於鄉再上春官始成進士選爲庶吉士讀中秘書愈自刮磨茹荼攻苦如寒士爲文根柢六經而步武莊列每意至卽伸紙濡毫頃刻千餘言氣洵洵不斷辟之騁逸驥而下堦坂也壬午授翰林編修甲申以議禮忤旨逮詔獄已而廷杖過楚竟卒年僅三十有七有文集若干卷

尚寶卿戚希仲元佐

戚元佐字希仲秀水人嘉靖壬戌進士文聲籍甚初議選館詞林兢推轂之忽中旨傳免後授儀曹會穆廟



登極典禮多所匡益宗藩一疏深憂碩畫不減賈洛陽  
雖報聞罷後世必有行之者已陞尚寶卿告歸居家廉  
靖不爲請謁長於詩文又善書畫著有青藜閣集

論德姚維東涑

姚涑字維東司馬鎮之長子也母張夫人夢五色鳥投  
懷遂生涑及長狀貌奇偉資識過人領正德丙子鄉薦  
連不第益肆力問學嘗曰讀書當與天下後世爭雄長  
一方不足爲也嘉靖癸未遂魁天下授翰林修撰爲經  
筵講官積誠感悟脫略詞華每進對稱旨歷陞春坊諭  
德人方以公輔期之會丁父艱以哀毀卒涑性孝友六  
歲喪母執禮如成人事繼母無間言尚書蔭例以嫡涑  
讓異母弟汲以悅親心涑讀書務爲經濟事不拘拘文  
辭如邊防海運皆有定議作諸邊圖時有翰林三絕之  
稱謂經學詩學史學也有明山集若干卷門人楊維傑  
哀其文爲之論曰漱六藝之芳潤獵百代之英華發而  
爲文夸目愜心竣如喬嶽浩如長江融如春陽烈如秋  
霜明與作者如公幾人人以爲知言

大理寺卿沈遂伯玄華



沈玄華字邃伯秀水人嘉靖壬戌進士少嗜學不問家  
人生產登第後屢告休沐閉門著述性善飲嘗左持觴  
右執卷伊吾至丙夜意得處輒引滿凡天文地理靡不  
綜究嘗考古今方輿自唐虞三代以至國朝其形勝阨  
塞要害皆有圖說字法趙松雪晚而極意鍾王終不能  
脫故步爲人謙厚不喜談人短仕至南京大理寺卿

文介先生支心易大綸

支大綸字心易嘉善人少穎拔讀書日數行下凡經史  
子籍天官地理兵農禮樂九流稗志無不精究嘉靖甲  
子舉於鄉甲戌始成進士試政西曹時江陵秉政嘗進  
白燕紅蓮以爲瑞綸言於朝曰大臣不宜稱祥瑞啟  
侈心開禽荒色荒之竇五月蓮固宜花卽不然物非其  
時謂之草妖燕玄鳥也白者金象兆爲兵奚瑞之有江  
陵聞而嫌之遂請教南昌踰年考最以前隙僅遷泉州  
司理時永春令以叨憤激民變監司欲兵之綸不可曰  
災民無告撫之宜自定乃單騎往諭之亂民萬計舉投  
戈赴愬卽渤海之靖亂弗及也侍郎洪朝選失江陵意  
當事者將中以危法綸執不從曰洪公庇正醜邪范孟



博之儔，殺之非法。又爲書具陳天道人事，不宜枉殺大臣。媚人以取容，聞者吐舌。江陵聞而益嗾之，遂中以考功法。家食七年，推補江西藩幕，遷奉新令，益斤斤自樹，時與上官爭小民之命，不可得，歎曰：「天下事尚可爲乎？」遂拂衣歸，行李蕭然。士民餼金三百治裝，綸笑曰：「若徒知予居官廉乎？卽罷官，廉固在也。」堅却之，歸而著書談道，清風穆如于菴。式廬未嘗報謝，生平偉抱，訐謨憤時，憂世結轡於胸懷，而逆轉於喉嚨者，悉於詩文中發之。練格高雅，鑄辭新警，卓然成一家言。卒年七十一，門人私謚曰文介先生。所著永昭兩陵史五十年間朝野實事，爛然大備，一以駕見衷之知罪不顧外，十餘稿三十卷。華平先生集四十卷，行於世。

工部右侍郎蔡子木汝楠

蔡汝楠，字子木，德清人。生而穎異，八歲隨父南雍，聽甘泉先生講白沙之學，輒點頭。一座大驚，十八舉進士，授行人，函璽書，授齊楚諸王府。所至輒按圖眺名山，賦爲詩歌，片紙所落，人皆曰不減漢之襍衡，與燕張言河南高叔嗣、毘陵唐順之、晉安王慎、錢唐許應元、姑蘇王省



曾及皇甫兄弟輩時時以聲律相唱和而汝楠之文譽遂翩翩一時已而以南京刑部員外郎出守歸德以強幹聞兩河間無何母艱歸築室前山之麓益發篋讀三代以來古六經孔孟莊列荀楊下及騷選釋老列仙百家之言無不摘其疵類而探其指歸服闋補衡州衡雖僻楚之南服故多才稍稍以經術醞釀之飭石鼓書院與諸生絃誦其中封以內多名山峭嶮祝融七十二峯之勝每政暇數携諸生出游游必有詩令諸生歌詠之口碑所頌人又皆曰是不減漢之文翁歷江西布政司叅政間行郡輒過鄒東郭祭酒羅念庵司諫相與論學以究性命之旨徙山東按察使再徙江西布政使歷都察院右副都御史巡撫河南召爲兵部侍郎典戎政出爲南京工部侍郎卒於官汝楠生平好著作不事生產自少服官至卿貳猶蕭然如書生四方賓客所共從遊徃徃若披穆風神解以去亦忘汝楠之歷官卿貳者所著有六經札記自知集樞管集白石文集八十卷藏於家

同知范孔嘉言

彭輅附



范言字孔嘉秀水人嘉靖丙戌進士居官極落自滿圻  
 令改學博歷國子監丞陞大理府同知致仕言博綜經  
 史善屬文里中以為嚆矢比部彭輅以文辭相頡頏范  
 宗韓歐有體裁彭宏肆綺麗出入史漢兩家各負氣不  
 相下說者謂范馴謹而彭文肆質靡落拓不羈卒自困  
 以老言所著有菁陽集

沈懋學仕

沈仕字懋學仁和人刑部侍郎銳之子也生而俊邁喜  
 讀書厭繩束故不習經生言雅好詩翰多畜古法書名  
 畫朝夕展玩久之有得乃援筆揮洒風神氣韻絕勝名  
 家壯年益豪放不羈縱適遊討為詩綺麗豐腴在大曆  
 以上點染花卉如黃荃山水筆法清勁師吳道子而胸  
 中丘壑甚富故結構多奇每言吳越山水淺薄不足以  
 豁眼界而開心胸於是渡江涉淮東走齊魯登秦岱北  
 抵燕薊歷九邊周覽既廣學益進而興益豪有購其詩  
 畫者饋遺累千金仕入手一揮而盡妻子在家不免飢  
 寒曠然不以爲意先世宦橐既蕪仕復不問生產比返  
 故廬僅四壁立猶以筆墨養其暮年然意所不當者雖



重貲不爲動士大夫以此重之年七十餘卒

武庫郎中應瑞伯雲鶯

父振肅附

應雲鶯字瑞伯象山人父振肅邑文學有聲生鶯最晚甫能言卽有大志嘗詣父讀書處見墳典盈架輒指而言曰會須讀盡此書方是男子父陰竒之及長遂刻意淬勵六經子史無不綜貫嘉靖辛丑成進士出宰臨川多神明之政陞車駕主事再遷武庫郎中時北虜跳梁數議征討防禦之計贊畫爲多丁內艱歸服闋補原任卒於官鶯儀觀修潔制行端嚴聞道甚早好古文辭凡所撰述悉根本六經而步武於遷固理明詞暢刊落陳言殆盡所著有臨川集經書講意東塘敲音象川雜稿

孝廉王茂成養端

王養端字茂成遂昌人倜儻負意氣抵掌談古今滾滾如懸河東下攻古文辭作聲詩如出唐人口吻舉順天亞魁大學士袁煒每推轂下之與濮州李先芳揚州宗臣諸名公相結甚惟平生著述甚富而最傳者有震堂集山居論

陳山人崔



陳山人名崔會稽人也。生而穎敏絕倫，博綜墳典，窮日夜不休。年十七，襲祖蔭得官，官故百戶。非其好也。居恒鬱鬱不樂，得奇疾，百療弗效。山人則自爲醫，七年始愈。愈而弃其故，所受官着山人服，人遂稱爲陳山人。山人詩文高古，若騷賦詞曲、草書、圖畫，能盡效諸名家。卽其所自娛戲，瑣至吳歛越曲、權歌菱唱、輓章薤露、儻逐侏儒、投壺博戲、酒政闔籌、稗官小說，與一切四方之語言、樂師、滕腹、口誦而手奏者，一遇興至，身親爲之，靡不窮態極調。至對客談說古今，與言一氣萬類，儒行玄釋，凌跨恢弘，又足以撼當世學士，而橋其舌以故賢豪。日造其庭，願得山人片墨，或望見顏色，一談一飲，以爲幸。山人又喜拔窮士，士或徃四方，又必借山人片墨以動豪貴人。每值山人飲，爭舉爵持俎，載筆素以進山人，則振髯握管，頃臾爲一擲，各愜其所乞，而後止。而徃復箋札，酌酢去留，目營心記，口對手書，又雜談論諧謔，一時雜陳，燦然畢舉。於是軒蓋益集，諸司巨公、卿郡邑長吏，或銜命之使，有未見鄉縉紳而先造山人者。山人卧未起，或時就榻見之。諸公旣異山人姿高其履，而山人指顧



自如雄談濶視雜以嘲詆無不心醉氣折願納交而去  
蓋居家如是者幾三十年以爲常晚游金陵客四年而  
不返旣卒同邑徐渭表其墓有曰山人氣雄邁跨諸貴  
游似東方朔敏似劉穆之其爲瑣細藝劇忽整衣憤談  
理道辨世務又大類曹植之見許淳然三人互有所短  
而山人獨兼之若海釀山負者然殆天所縱也邪吾不  
能測山人矣其爲名流所欽服如此

項子瞻元淇

弟元汴附

項元淇字子瞻秀水人生有至性狷介寡儔不治家人  
生產居恒博學嗜古於書無所不窺工詩辭尤好臨摹  
古法書草聖每遊戲翰墨尺幅數行人競寶之季弟元  
汴博物好古尤精繪事家藏丹青墨跡每與到輒臨摹  
題咏其間自命曰墨林

田督學汝成

田汝成錢塘人性穎敏博學強記流覽百家言覃心作  
述爲文沈涵濃郁有齊梁風尤善爲記事書其叙事理  
纏纏多雅致兩爲督學使者盛有文譽杭士自弘正來  
揚聲藝苑者若許給諫相卿吳少叅鼎許右使應元暨



汝成爲最著云。

按察僉事楊汝承祐

楊祐字汝承，世家蘭谿。曾祖永政，徙嚴之建德。祖大昇，再徙錢塘，遂爲錢塘人。少英敏，博學。年十八，當嘉靖改元，領浙江鄉薦。春官不第，歸治一室於河湄，散列羣籍，日流覽其中。八年，始成進士第。試月初，生賦。天育驃騎歌，改翰林庶吉士。明年，出知興國，屢遭讒忌。時起時蹶，僅歷官湖廣按察司僉事。以暴疾卒於官，年纔四十餘耳。海內士大夫聞之，爭相吊，曰：「文人已矣。」當是時，北地信陽以古文雄視西土，而大江以南則故翰林江澗叅議吳鼎與祐後先崛起。與何李並軌，而馳初祐之上計。京師也，鼎嘗論敘送之，以爲賈生明國體，而匡衡推經術，紹嘉薛軌。其楊生祐亦獨喜自負，爲文章奔放凌轢，若馳車九折之坂，而河決金堤，莫之能禦也。其議論雄辯勇決，颺起泉湧，卒然聞之，駭汗愕視。至其才用，更自天性，他人縱軻已獨奮前，矧發穎脫旁，不見曹伍。然亦以此見忌，身不安位，而年不竟才，世共惜之。所著有端居興國西曹郵城濟南西江湖上荆南諸集，藏於家。



江西左布政使徐子與中行。上。無。南。前。事。錄。文。卷。之。四。五。聖。徐中行字子與，長興人。生而穎警，十數歲，即能舉子業。旁及古文辭，十六補邑諸生，無何領鄉薦，遂進遊南太學，益爲古文辭，行白皙，美姿容，眉目如画，能飲酒，工諧笑，所周旋無非賢豪長者，以故聲籍公車間，凡十年而成進士，授刑部廣東司主事，當是時，濟南李攀龍、婁江王世貞同爲諸曹郎，以古文辭名，行竊心下之交，兩人最驩，而同年中若梁有譽、宗臣、吳國倫咸來相劇切，行遂取舊草悉焚之，自是詩非開元而上，文非西京而上，無述矣。會曹郎楊繼盛者，上書劾相嵩論死，猶在繫，行時時橐饘食之間，一入相慰語，慷慨歎歎泣數行，下相嵩伺知之，怒甚，勿恤也。尋晉員外郎郎中，而繼盛已得死，行解橐歸，其喪相嵩伺知之，怒益甚，遂出知汀州外艱歸，服除補汝寧，兩政俱以最聞，而相嵩之怒未解也。竟中以察歸，行好客，客時時滿座，稍能綴韻，或搯一藝者，至行家如歸，問衣則衣，問食則食，問所虛借則爲草薦書數十函，不倦，行以是益困，母夫人從容語行曰：「而不念來日耶，而不爲祿，且上英斷，正臣新柄，國不以。」



時白見寃狀，勉圖功名，自効而刺促一塵。若水上耶，行感乃之吏部，選得長蘆轉運判官。三月，遷瑞州府同知，以母喪奔歸，哀毀幾不勝。時徐少師階當國內，重行超爲山東按察司僉事，服除，補湖廣武昌武昌首道也。案積委克宇，行以精心，應之立剖，積資爲雲南布政司左叅議，寒暑無間，行部出則用什伍，法練士入則緩帶延儒生，講說稊文，彬彬矣。以賀萬壽行，悉留其携書數

千卷，寘公庫，遷福建按察司副使，尋爲右叅政，逾年而進按察使，凡三治其省，政益習，歲時讞決，寢平而城西有積水百頃，一山踞之，行乃捐俸入，創亭榭，勝處沿隄植桃柳，輕橈徐進，與僚佐引觴，詩閩人指謂使君，何必減山荆州哉。遷江西右布政使，尋轉左領郡，至十餘所，緝三王國子，戾而下，祿食供億以千萬計，而他所請質平，停綜覈，頃刻百端，造請臺使，賓筵館餉無虛日，行談笑應之，咸歎服，以爲神。一夕，以中痰卒，年六十有二。橐中無俸餘，不能其棺，歛時王世懋方分部南康，驚而奔，以一日夜至，力爲經紀，其道路費始得歸。行孝友敦睦，寬然長者，其舌有瘞而無否，汎愛親仁，久而彌篤，當



時所稱七才子者，行獨莊，事李攀龍，不敢以友進者，終其身，宗臣、梁有譽，早死。李攀龍高簡，少延納，吳國倫與王世貞，不耐口語，而世貞性復踈脫，卽搯觚者，思甘心焉。而於行靡間言，以故得醍醐稱。一日，國老和而甘，且善劑也。行於詩格高而調逸，近體弘麗，悲壯讀之神聳。文趨步古昔，所立卓爾。有青蘿館集、續集、天目山堂前集，凡若干卷，行於時。

徐文長渭

徐渭，字文長，山陰人。幼孤，性絕警敏，九歲能屬文。年十餘，倣楊雄解嘲作釋毀二十，爲邑諸生試，輒雋，而鄉書不薦。武進薛憲副應旂督學浙中，大奇之，名益起。未幾，胡總督宗憲招致幕府，管記室。時獲白鹿海上，命渭作表以進。上大嘉悅，其文旬日間遍誦人口。憲以是益重渭，然渭性豪蕩，不羈。旣直幕府，猶時出從諸少年，狎飲市肆，幕中有急需，召渭不得，夜深開戟門以待之。偵者得狀報曰：徐秀才方大醉，嚙蠶不可致也。憲聞則喜曰：甚善，甚善。時幕府勢嚴重，文武將吏庭見，匍伏無敢仰視者，而渭戴敝烏巾，衣白布澣衣，直闖門入，示無忌。



諱憲常優容之。涓亦矯節自好，無所顧請。然性豪恣，或籍氣勢，以酌所不快。人亦畏而怨焉。及宗憲被逮，涓懼禍及，因陽狂，已乃爲真。尋遘鄴炎之獄，幽圜者八年。張宮諭元忭重其才力，援之獲免。旣出獄，日閉門與數狎者飲，噱而深惡諸富貴人。自郡守丞以下，求與見者皆不得也。人多以是怪恨之。晚絕穀食者十餘年，人問何居，曰：吾敬之，久偶厭不食耳。無他也。尤不事生業。客幕時，有餽之泔，戒十許足者，遂大製衣被，下及所嬖私褻之服，靡不備者。一日都盡。及老，貧甚，粥手自給。然人操金請詩文書畫者，值其相裕，卽百方不能得。遇窘時，乃肯爲之。所受物，人人題識，必償已，乃以給費。不卽餒，餓不妄用也。有書數千卷，後斥賣殆盡。嚮破弊不能再易，至藉藁寢。年七十三卒。涓初坐法，繫獄中，憤愆欲自決。爲文自銘其墓，有曰：涓爲人，度於義無所關。時輒踈縱，不爲儒縛。一涉義所，否雖斷頭，不可奪。平生有過，不肯掩。有不知耻以爲知，斯言蓋不妄者。其自名如此。涓於行草書尤精，奇偉傑。嘗言：吾書第一，詩二，文三，畫四。識者許之。涓歿後數載，楚人袁宏道來會稽，得涓集。



讀之稱爲有明一人，因爲之傳，有曰：文長旣已不得志於有司，遂乃放浪翹蕖，恣情山水，走齊魯燕趙之地，窮覽朔漠，見山奔海立，沙起雲行，風鳴樹偃，幽谷大都，人物魚鳥，一切可驚可愕之狀，皆達之於詩，其胸中又有一段不可磨滅之氣，英雄失路，託足無門之悲，故其爲詩如嗔如笑，如水鳴峽，如種出地，如寡婦之夜哭，羈人之寒起，當其放意疇千里，偶爾幽峭，鬼語秋墳，文長眼空千古，獨立一時，當時所謂達官貴人，騷士墨客，文長皆奴而叱之，耻不與交，故其名不出於越，悲夫！所著

文長集、關編、櫻桃館集、註莊子內篇、參同契、黃帝素問、郭璞葬書、各若干卷、四書解、首楞嚴解、各數篇，皆有新義。渭貌修偉，肥白音朗，然如唳鶴，常中夜呼嘯，有羣鶴應焉。二子曰枚曰枳。

翰林院修撰沈懋孝

沈懋孝，平湖人，自幼明敏絕倫，讀書數行俱下，一過目輒不忘，爲文洋洋纚纚，宿學覩之皆避席。年十九舉嘉靖乙卯鄉試，壬戌捷春官，不廷試，歸隆慶戊辰始入對。大廷選庶吉士，歷翰林院修撰，典試南畿，中蜚語，謫判



兩淮遂拂衣歸。懋孝生平無他好，唯篤嗜圖史。自金匱石室之書，以至名山大川之藏，無不搜羅研究，其博洽近代無比。故屬文最富麗典則，每有乞其文者，輒引紙疾書。不經思索，不加點竄，視其紙之長短，必竟紙乃已。與客談古今事及品評子史，則議論風生，抵掌不倦。賦性超超塵外，不問家人生產，卽千金在前，頃刻散盡，以故家日落，里居近三十年，戶外事絕，不與聞朝夕。苦吟不減，諸生時所著有長水集若干卷行於世。

方太守九叙

方九敘錢塘人，少卽慕古修辭，冀託不朽。長與海內諸名家唱和，甚有聲釋褐，除兵部主事，守山海關，明習邊務，將率憚之，葺倉貯穀，散種食於民，不徵其息。比代羣下號哭，擁馬首不得行，僞留傳舍，乘夜間去。積官知承天府，性抗毅，直行屢忤巨璫，遂投劾歸，益討故業，易綺麗入冲雅，居然稱大家。爲人高朗，善論事，當其抵掌上，下古今千百年如身處其際，而爲之折旋，負經濟之才，不究其用世共惜之。

袁州司理徐茂吳桂



徐桂字茂吳餘杭人形短鰲瘠偏盲而性警敏讀書一過目輒上口博綜經史工古文辭登隆慶辛未進士第授袁州府推官堅正不阿每執法失上官指遂投劾歸僦居杭城之東隅地幽僻有亭池竹木之勝亭中列古圖史金石遺文與商彝周鼎雜諸法書名畫日婆娑其中。有潔癖巾幘衣履無不精楚客有過之者先使人覘視衣服新潔方便使前促膝無所忤及去猶令人交帚拂其坐處衣垢貌寢者避之如仇人以是怪恨之不變也尤以高簡自持郡邑將初至公謁外無半刺人亦以是莊重之興至發爲詩歌齊響漢魏六朝間天寶大曆以下不使一字入筆底海內慕其名以碑碣版刻求之者非其人千金不與也詩尤長咏物古人咏物率以五言而桂獨以七言尤難鍛鍊句字無不工者西湖十詠膾炙人口屬和者數十家終不及也所著有詩文雜稿數十卷行於世

太學茅穉延翁積

茅翁積字穉延鹿門先生長子鹿門以文章名海內而翁積才更高名駸駸出鹿門上性嗜酒飲數斗不醉醉



輒瀆筆爲詩文數萬言立就人稱爲李謫仙之流翁積亦以謫仙自命不可天下士醉見人輒罵見尊貴人益大罵不少屈未幾以諸生高等推入南國學爲都講與院妓狎遂置別室時微有不能容者遂構誣以獄死論者曰李謫仙識郭汾陽於卒伍其識力固高天下方其脫靴殿上時目中安知有天子耶才士豪氣不除竟被讒謫死非不幸耳第當時無汾陽已從永王璘族矣翁積負謫仙才目中未嘗見天子安論有無第以豪氣陵轢一世遂因脫輻馴至覆車益死之冤痛於夜郎遠矣時無汾陽其人遂使豪傑之士身填牢戶士之於知己顧不重哉翁積死幾五十年詩文猶膾炙人口惜多散佚者所存僅芸暉館數卷而已其所作自敘文蓋獄中絕筆也

布政司叅議吳明卿國倫

吳國倫字明卿其先嘉興人以祖戍湖廣興國州遂家焉生而穎異讀書一目數行俱下童卯卽善屬文宿儒讀之無不神聳曰此兒文中繡虎也二十省試第一明年成進士釋褐尚書郎間曹無事益肆力古文辭當是



時作者蓋有七人而齊則有李攀龍于鱗謝綦茂秦吳則有王世貞元美維揚則有宗臣子相吳典則有徐中行子與南越則有梁有譽公實明卿以生於楚遂稱楚材並集都下籍甚縉紳間茂秦布衣之俠爲于鱗嚆矢于鱗獨建旗鼓元美副之明卿子相屬鞭弭中原不相避舍而子與公實爲之雁行蓋于鱗法元美儁子相豪子與公實淳而明卿雅矣其宦轍所至歷燕楚閩粵貴竹大梁幾半天下故詩文老而益雄年五十四卽謝方岳歸高卧下雉之數以騷雅風動一世者垂十餘年而後卒所著有甌蜚稿若干卷新安許相公序而論之曰國初劉宋輩出洽覽羣書仍元舊貫時謂博雅弘正之際李何挺生徐薛嗣起追漢襲晉規魏纂唐時謂古雅爰及嘉靖作者七人嘔心抉肝窮工極變思務出奇語必驚衆雄視徃古目無當代時謂高雅而明卿詩循循乎有玄暉摩詰之風焉其文稱是謂之爾雅始安張鳴鳳亦曰百世而後如獨舉詩七子間篤古中程首稱精雅者舍明卿其誰或曰師曠調鍾知音期於異代知言夫知言夫



文苑  
卷之四十七  
誥贈工部都水司郎中沈澄夫涑 子孝徵附

沈涑字澄夫海鹽人生有雋才髮未卅吐語卽憂憂畏人老儒不能辯督學使者畢鏘試而竒之取冠博士弟子其後吐語益曳曳讀而知之者絕少試益詘乃聚其稿燒之去習秦漢人詞益出於竒恠神行鬼從蛟閩鼉奮其指細天地少萬物翻倒皇帝王伯重闢日月而新之每捉筆伸紙呼吸數萬言立就未匝歲所著滿篋家人弗戒燔於火以告且請死弗答顧命益紙連屋無何所著復盈篋又燔於火乃罵曰咄咄祝融子何妒乃爾庸詎能燔吾腹耶自是意所剗刻口以授其子孝徵不復執筆而孝徵生六歲卽能與父屬句父喜摩其頂曰吾兒出語有竒氣不媿乃翁第而翁扼於竒終身弗售爾慎毋以竒自喜以爾之才而降心帖括取青紫如拾芥爾縉紳筆舌易爲聲價出素所降心者以凌駕古人當雄視一世矣而翁未竟之志在爾小子其勉之孝徵拱手而應曰諾於是斂其竒崛紆爲恬雅十九試博士卽冠其曹戊子領鄉書兩上春官不第益潛心正始之音戊戌成二甲進士釋褐工部都水司主事註選簡六



科廊事兼管 乾清 坤寧二宮工程督造香山公主  
墳越二年奉勅督理清江漕廠兼理河道三年陞本司  
郎中奉勅督理南河管淮揚河道明年以病予告起補  
本司正郎奉勅督修 顯陵尋陞河南按察副使整飭  
撫民兵備分巡汝南道推陞陝西關南道叅政會中蜚  
語歸家聽調兩臺交薦卧不應堅遜凡十二年一日以  
微疾終孝徵天性篤孝以父貧而好施務有以繼其志  
凡俸入所餘悉推以周姻族閭里之貧者居官勤瘁所  
至除奸剔蝥不遺餘力取予之際一介不苟每日余不  
敢以苞苴之微汚吾清父且余素奉教於君子矣清以  
持已勤以服官如是而已故其督墳香山也中官憚其  
清核不敢肆侵漁工凡十月告成而昌平守者例以廩  
給百金進孝徵怫然曰食常祿而勞王事何用此廩給  
爲其受事清江也中流擊楫自矢曰當今稅璫橫行飛  
而食人民不堪命寬卹民力爲今日第一義苟虐商民  
而潤私橐者如此水及入署而惰窳有禁漁獵有禁建  
漕廠條議數千言媿媿皆爲碩畫所節省歲以億萬計  
而稅使魯保耽耽虎視率諸無賴潛偵所轄事宜將梗



我漕政孝徵乃庶而執之悉抵於法由是橫璫屏息長  
淮南北之人始帖席臥三年報代徃例四總予千金奉  
使者爲都下交際費孝徵見之怫然曰堂堂使臣襲此  
陋規縱面目可飾如屋漏何且曰吾懼無以見吾父地  
下也其清以成孝類如此然性耽篇詠卽鞅掌不廢淮  
揚多水嬉長橋風月甲天下每公暇輒命小舟具肴核  
酒茗同四方之騷人墨客騎雀於是者爲汗漫游酒酣  
耳熱輒拈題擊鉢詩後成者罰以金谷酒數鉢響方鏗  
孝徵徃徃先就同賦者讀之無不心折也篇章之夥每

流傳民間婦人孺子皆能歌之曰此吾沈使君之與民  
同樂者矣當是時孝徵之文名滿天下益高自矜詎下  
視俗吏如水火竟以是被誣歸不色愠也每慨然曰吾  
父苦心一世文光化爲祝融竟無一字留爲楷模者吾  
不肖得以文章繼先業使不傳於父者傳於子則父死  
之年猶生之日矣何幸如之至於升沉通塞安足介吾  
慮哉故疾革之日耳提諸子曰若輩辛苦讀書毋墮祖  
若父之聞一語不及私及卒縉紳士大夫毋論識不識  
皆曰東海之文瀾涸矣所著有玄暢閣集行於世他如



疏議雜詠啓牘牋奏論辯序記等篇其子延銓延錄彙而集之曰天放新編若干卷藏於家

光祿寺署正卓徵甫明卿

卓明卿字徵甫仁和人。美姿觀，眉目如画。有衛洗馬風。爲人烈亮，薄章句，竊與豪子弟學騎射劍術。父賢覺而督責之，曰：「少年子不守檢柙事，詩書而慕豪俠之行，夫士有鳴玉簪筆侍金華安事，兵明卿始折節閉門博綜百氏，所交傾海內豪傑，近則杯醪遠則竿牘，苟失一名，下士明卿耻之士，或不爲明卿知，至相誚不比於人數。」

雖信陵執轡鄭莊置驛，不是過也。初爲舉子業，與兄孝廉文卿同舍，孝廉肅精一業，而明卿性跼蹐，爲文直舉胸懷，以是不合於累黍，獨時時好稱詩，取裁斷自大曆。初爲國子生，賦桃溪書屋詩，詩聲滿留都。及北上拜官，光祿游日益廣，諸名公咸忘年折行，與明卿結爲盟，而稱詩長安市中，尋乞歸侍養。晨昏奉七箸，操几杖者十年。父賢家埒素封，爲人抱樸，不游秣苑，至明卿投冠高蓋，好文章交游，入則接筵，出則連駟，居左右多窄袂褰鞞，執籌列肆者，私謂卓家兒不類卓氏，其衰乎，乃相與



訕笑去時有鍾生懋者奇士好稱詩母被崇雉經嬾姑  
素勃谿緣坐於生罪死明卿故善令陳請啓禁視故人  
日暮故不出令趨之曰吾以父老故自孝子寃十年不  
得信今又不幸死此身已許故人寧與俱繫耳令歎曰  
有死友而無生親乎是夕深文解而生得論戍塞上然  
明卿與生實未之識也於是遠近咸誦公誰謂卓郎夸  
毘子哉儒則通儒俠則節俠過乃翁長者矣父艱服闋  
補光祿寺珍羞署正以疾卒明卿天性亢爽恒乘單舸  
香爐茗椀浮家具越山水間累月忘返又稍喜遊手酒  
人家釀新熟與客浮白放歌聲出金石時發詼諧談言  
微中淳于生東方曼倩之流乎中歲習禪寂結石禪庵  
栖託蓮花貝葉間是將以無生竟矣而竟死是必有不  
死者存耶所著有卓氏藻林唐詩類苑卓徵甫文集續  
集比游稿行於世

東臯子殷方叔仲春

殷仲春字方叔廣西叅政近仁之裔生而澹泊喜讀書  
工詩文慕隋東臯子之爲人自號東臯子隱居教授棲  
嘉興郡之社南茆屋葭牆不蔽風雨每携數十錢行遊



市中購古帖殘書補葺讀之往往申且不寐聞者笑以爲迂漫弗顧也精於醫遇人無貴賤疏數櫛風雨冒寒暑雖委巷痺室必往往則惟操舴艋小舟平頭奴子而已或曰盍不爲豪態以瞰里中兒仲春日隱於壺隱於壁車畫舫乎且令病病者兼病貧我不忍爲也刀圭所投無不立起人然不索金錢不結豪貴所居差拓徃初而席帽敝裘如故天性孝友父歿喪葬如禮悉以身肩之不煩諸季母病篤露禱告天請移十年之筭以益母母霍然起果十年而歿一日火震於隣遠近奔捍仲春家米鹽甕盎悉移去火滅仍歸之尺寸無所失人以爲盛德之報仲春雖醫隱然博通六籍百家言精綜古詩賦興至捉筆徃徃追步古人黃學士洪憲以詩文名家慎許可得仲春葆楮一賦讀之大竒曰不意菰蘆中復見此異人因時時與徃來微察其隱多非文章士之所能及者大嚴重之爲立傳縣志隱逸中時沈大司馬思孝歸客有譖者曰一醫師而登志書大可異沈司馬乃微服訪仲春闔其戶陋室也叩之無城府醇謹樸愿人也徵其書皆丹鉛手自乙也其詩文漢魏六朝伯仲間



也。沈司馬大悔，知仲春晚，再拜迎至家，嚴以上客之禮。且歎曰：使邑志盡如殷先生者，吾可無憾矣。凡志書生者，不立傳，生而立傳者，謂其貧不改搯也。自殷仲春始。卒年七十有一，所著有墨鳳品藻，有醫藏，有續醫說會編，有集數十卷，藏於家。

### 吳少君孺子

吳孺子，字少君，蘭谿人。幼從父一源，歲貢上京師。父病痺，遂扶侍歸。大父明由省薦，俱不及授官。卒，孺子貲故薄，更凶閔，相屬習，嬾不問家人生業，晝粥其田廬。生子不育，妻妾俱夭，遂以無家徒侍遊。而孺子雅閒靜，墨墨自秘，外若不激，亢中實堅。卒不肯熾，趨迎人之意，顧又無所挾，以傾動當世。以故游道不振，而身益貧。初，孺子爲兒時，父不用經史課孺子，獨以杜詩一編授之。孺子遂工詩。至是以貧益工，而游益不振。所至率寓蕭寺中，不樂止富貴家。卽終日不再炊，累歲不更製，意廓如也。善畫，尤工雞鶩，性最巧，所規制必精絕。一瓢瓠爲之，携過荆溪，爲盜所擊破，携李人猶寶售之。太倉王元美爲作破瓢道人歌，一離奇鼎，拾燒餘枯柢爲之。四明余



君房爲之銘。一曲几萬歲。藤爲之前。膝榻上可憑而寐焉。它物不可名舉。孺子嘗自稱古公輸般。何以過我。及卒。諸奇物俱散失。獨遺稿若干首。海鹽錢懋毅刻而存之。而甬東沈嘉則爲之序。略曰。少君詩吐自胸臆。語皆實際。景必心會。而情與事偕。然後韻而成之。不虛設。無輾泊。蓋深得杜少陵之幽峭。而口吻略無所侵。故言雖辛酸。色不枯槁。意則悲涼。氣不萎蕩。每讀之。如置身複嶺。俯耳清籟。小雨入林。孤雲度嶂。使疲者忘倦。勞者息肩。雖飄寄僧僚手。而風形貴介。視世之游者。借交齋伎不同。日語矣。海內知吳少君者。率以嘉則之言爲不阿所好云。



兩浙名賢錄卷四十八目次

方技

漢

趙公阿炳

謝堯卿夷吾

韓叔儒說

三國吳

吳文則範

曹弗典

晉

嚴卿

賀思令



戴國流洋

王敬伯

賀道養

宋齊梁陳

光祿大夫孔靈產

吳典令賀道力

謝參軍善助

夏赤松

濮陽太守徐熙

徐秋夫

蘭陵太守徐道度

杜道鞠范悅時  
褚欣遠褚胤附

徐常侍文伯

正員郎徐叔紹嗣伯

兖州刺史徐之才

智永

驃騎大將軍姚法衛僧坦

父菩  
提附

隋

舒綽

廷尉卿沈法朗僧昭

吳嶠

唐

沈七

陳昭

徐維嶽嶠之

辨才

陳閔

孫處士位

五代



吳仁璧女

陸晃 詹希雅附

宋

書學博士孫景璠

王肇卿

吳傳朋說

李明甫

毛會

釋仁

進士盧碩父鴻

吳應能

張司農習之

范復初疇

項彥升舉之

金紫良醫陳沂

太醫丞錢仲陽乙

韓隄

宋彥誠棣

王彥昭克明

工部侍郎馬和之

邢氏

富春子孫守榮

耿聰聲

畫院待詔林椿

進士錢舜舉選

劉松年

畫院待詔李嵩

待詔夏禹玉珪 子森附

畫院祗候樓觀 馬遠遠子麟附

夏巨源

羅子敬知悌

嵇仁伯清

趙必復初暘

李立之

毛存



毛梓孫

元

張德元

陳宗山

楊子固維翰

劉資深

吳先生

金應桂

陳仲美

王思善

王若水

孤雲居士王振鵬

莫起炎月

王

馮

馮道助

鮑原禮敬

張夢庚

黃子久公

秦州知州王叔明蒙

吳孟思睿

馮君道

承應法師陳可復

錢九五

僧若芬

抱一翁項彥章

兩浙名賢錄卷四十八目次終



趙公阿炳

兩浙名賢錄卷之四十八

東海徐象梅仲和氏誤

樵李屠中孚德胤氏閱

方技

漢 共三人

趙公阿炳

趙炳字公阿東陽人能為越方以氣禁人人不能起禁虎虎伏地低頭閉目便可執縛以大釘釘柱入尺許以氣吹之釘即躍出射去如弩之發機以盆盛水吹氣作



禁魚龍立見時遭兵亂疾疫大起與閩人徐登遇於烏傷溪上相謂曰今既同志且可各試所能登乃禁溪水水為不流炳復禁枯木木即生莫二人相視而笑共行其道貴尚清儉禮神惟以東流水為酌削桑皮為脯但行禁術所療皆除後登物故炳東入章安百姓未之知炳乃故升茅屋支鼎而爨主人驚懼炳笑不應既而爨熟屋茅無損又嘗臨水求渡船人不許炳乃張蓋坐其中長嘯呼風亂流而濟於是百姓神服從者如歸沒後人為立祠於永康至今蚊蚋不能入

謝堯卿夷吾

謝夷吾字堯卿會稽山陰人也少為郡吏學風角占候太守第五倫擢為督郵時烏程長有威彙倫使收案其罪夷吾到縣無所驗但望閣伏哭而還一縣驚怪不知所為及還白倫曰竊以占候知長當死近三十日遠不過六十日遊魂假息刑無所加故不收之倫聽其言至月餘果有驛馬齋長印綬上言暴卒倫以此益禮信之舉孝廉為壽張令遷荊州刺史豫尅死日如期果卒勅其子曰漢末當亂必有發掘露骸之禍使懸棺下葬墓



而不墳。

### 韓叔儒說

韓說字叔儒會稽山陰人也博通五經尤善圖緯之學舉孝廉與議郎蔡邕友善數陳災眚及奏賦誦連珠稍遷侍中光和元年十月說言於靈帝云其晦日必食乞百官嚴裝帝從之果如所言中平二年二月又上封事尅期宮中有災至日南宮大火遷說江夏太守以公事免年七十卒於家

三國吳

共二人

### 吳文則範

吳範字文則會稽上虞人也。以治曆數知風氣聞於郡中。舉有道詣京都。世亂不行。會孫權起於東南。範委身服事。每有災祥。輒推數言狀其術多效。遂以顯名。初權在吳。欲討黃祖。範曰。今茲少利。不如明年。明年戊子。荆州劉表亦身死國亡。權遂征祖。卒不能克。明年軍出行。及潯陽。範見風氣。因詣船。賀催兵急行。至卽破祖。祖得夜亡。權恐失之。範曰。未遠必生禽祖。至五更中。果得之。劉表竟死。荆州分割。及壬辰歲。範又白言。歲在甲午。劉



備當得益州。後呂岱從蜀還，遇之白帝，說備部衆離落，死亡且半，事必不克。權以難，範曰：「臣所言者，天道也。而岱所見者，人事耳。」備卒得蜀，權與呂蒙謀襲荊州。議之，近臣多曰不可。權以問範，範曰：「得之後，羽在麥城，使使請降。」權問範曰：「竟當降否？」範曰：「彼有走氣，言降詐耳。」權使潘璋邀其徑路，覘候者還，白羽已去。範曰：「雖去不免。」問其期，曰：「明日日中。」權立表下漏以待之。及中不至，權問其故，範曰：「時尚未正中也。」頃之，有風動帷，範拊手曰：「羽至矣。」滇、夷外稱萬歲傳言得羽，後權與魏爲好，範曰：「以風氣言之，彼以貌來，其實有謀，宜爲之備。」劉備盛兵西陵，範曰：「後當和親，終皆如言。」其占驗明審如此。權以範爲騎都尉，領太史令。數從訪問，欲知其決。範秘惜其術，不以至要語。權以是恨之。初，權爲將軍時，範嘗白言：「江南有王氣，亥子之間，有大福慶。」權曰：「若終如言，以君爲侯，及立爲吳王。」範時侍宴，曰：「昔在吳中，嘗言此事，大王憶之邪？」權曰：「有之。」因呼左右，以侯綬帶。範知權欲以厭當前言，輒手推不受。後論功行封，以範爲都亭侯，詔臨當出。權恚其愛道於已也，削除其名。黃武五



方技  
年病卒，長子先死，少子尚幼，於是業絕，權追思之。募三州有能舉知術數如吳範者，封千戶侯。卒無所得。

曹弗興

曹弗興，吳興人，善畫，名冠一時。時有吳範善曆數，劉淳善星文，趙達善筭，嚴武善奕，朱壽善占，夢皇象善書，夏姬善相，并弗興畫，稱為八絕。嘗畫赤龍以獻孫皓。後宋文帝時大旱，取弗興赤龍置水傍，應時得雨。

晉 共五人

嚴卿

嚴卿，會稽人也。善卜筮。鄉人魏序欲暫東行，荒年多掠，盜令卿筮之。卿筮曰：君慎不可東行，必遭暴害之氣，而非劫也。序不之信。卿曰：既必不停，宜以禳之。可索西郭外，獨母家白雄狗繫着船前，求索止，得駮狗，無白者。卿曰：駮者亦足，然猶恨其色不純。當餘小毒，正及六畜輩耳，無所復憂。序行半路，狗忽然作聲，甚急，有如人打之者。比視已死，吐黑血斗餘。其夕，序墅上白鷺數頭，無故自死，而序家無恙。

賀思令



賀思令會稽人善彈琴嘗夜坐月中臨風鳴絃忽有一人形貌甚偉着械有慘色在中庭稱善便與交語自云是嵇中散謂賀云卿下手極快但於古法未備因授以廣陵散賀遂傳之今世所傳譜是也

### 戴國流洋

戴洋字國流吳興長城人也年十二遇病死五日而蘇說死時天使以爲酒藏吏授符籙給吏從幡麾將上蓬萊崑崙等山旣而遣歸逢一老父謂之曰汝後當得道爲貴人所識及長遂善風角爲人短陋無風望然好道術妙解占候卜數吳末爲臺使知吳將亡託病不仕及吳平還鄉里都水馬武舉洋爲都水令史陳眈問洋曰人言江南當有貴人顧彥先周宣珮當是不洋曰顧不及騰周不見來年八月榮果以十二月十七日卒十九日騰珮以明年七月晦亡王導遇病召洋問病洋曰君侯本命在申金爲土使之主而於申上石頭立冶火光照天此爲金火相爍水火相煎以故受害耳導卽移居東府病遂差元帝將登祚使洋擇日洋以爲宜用三月二十四日丙午太史令陳卓奏用二十二日言昔越王



用甲辰三月反國范蠡稱在陽之前當主上下盡空德將出游刑入中官今與此同洋曰越王爲吳所囚雖當時遜媚實懷怨憤蠡故用甲辰乘德而歸留刑吳宮今天王內無含咎外無怨憤當承天洪命納祚無窮何追越王去國留殃故事邪乃從之及祖約代兄鎮譙請洋爲中典軍遷督護永昌元年四月庚辰禺中時有大風起自東南折木洋謂約曰十月必有賊到譙城東至歷陽南方有反者主簿王振以洋爲妖自約收洋付刺姦而絕其食五十日言語如故約知其有神術乃赦之而讓振振後有罪被收洋救之約曰振徃日相繫今何以救之洋曰振不識風角非有宿嫌振徃時垂餓死洋養活之振猶尚遺忘夫處富貴而不弃貧賤甚難約義之卽原振賜洋米三十石至十月三日石勒騎果到譙城東洋言於約曰賊必向城父可遣騎水南追之步軍於水北斷要路賊必敗約不聽賊乃掠城父婦女輜重而去約將魯延求追賊洋曰不可約又不聽使兄子智與延追之賊僞弃婦女輜重走智與延等爭物賊還掩之智延僅以身免士卒皆死時梁國人反逐太守袁晏梁



城峻險，約欲討之而未決。洋曰：賊以八月辛酉日反，日辰俱王，辛德在南方，酉受自刑，梁在譙北，乘德伐刑，賊必破亡。又甲子東風而雷西行，譙在東南，雷在軍前，爲軍驅除。昔吳取荊州，天雷在前，周瑜拜賀。今與往同，故知必尅。約從之。果平梁城。太寧三年正月，有大流星東南行。洋曰：至秋府當移壽陽。及王敦作逆，約問其勝敗。洋曰：太白在東方，辰星不出，兵法先起爲主，應者爲客。辰星若出，太白爲主，辰星爲客。辰星不出，太白爲客。先起兵者敗。今有客無主，有前無後，宜傳檄所部，應詔伐之。約乃率衆向合肥。俄而敦死，衆敗，遂住壽陽府內地。忽赤如丹。約問洋。洋曰：按河圖徵云：地赤如丹，流血九丸。當有下犯上者。恐十二月二十七日，胡馬當來飲淮水。至時，石勒騎果至攻城大戰。咸和初，月暈在角，有赤白珥。約問洋。洋曰：角爲天門，開布陽道，官門當有大戰。俄而蘓峻遣使招約俱反。洋謂約曰：蘓峻必敗。然其初起，兵鋒不可當。可外和內嚴，以待其變。約不從。遂與峻反。遣部將李繫將兵到廬江。其衆潰散。約懼，召洋問之。曰：吾還東，何如留壽陽。留壽陽，何如入胡。洋曰：東入失。



半入胡滅門留壽陽尚可約遂到歷陽尋而牽騰叛約約率所親將家屬奔於石勒卒爲勒所誅及親屬並盡皆如洋言約旣死中郎將桓宣以洋爲叅軍將隨宣往襄陽太尉陶侃留之住於武昌時歲鎮二星共合翼軫勸侃伐秦以取中原會侃薨不果征西將軍庾亮代鎮武昌復引洋問氣候洋曰武昌土地有山無林政可圖始不可居終山作八字數不及九昔吳用壬寅來上創立宮室至巴西還下秣陵陶公亦涉八年土地盛衰有數人心去就有期不可移也公宜更擇吉處武昌不可久住五年亮令毛寶屯邾爲賊所陷亮問洋曰故當不失石城不洋曰賊從安陸向石城逆太白當伐身無所慮今乃不憂賊但憂公病耳亮曰何方救我疾洋曰荊州受兵江州受災公可去二縣亮曰如此當有解不洋曰恨晚猶差不也亮竟不能解二州遂至大困洋曰昔蘓峻時公於白石祠中祈福許賽一牛至今未解故爲此鬼所考亮曰有之君是神人也或問洋曰庾公可得幾時洋曰見明年時亮已不識人咸以爲妄果至正月一日薨庾翼代亮洋復爲占候少時卒年八十餘所占



驗者不可勝紀

王敬伯

王敬伯，餘姚人，善鼓琴。仕為東官扶侍，嘗至吳郵亭，維舟中渚，秉燭理琴。見一女子披帷而入，二女子從焉。先施錦席於東床，既坐，取琴調之，聲甚哀。女子曰：「此曲所謂楚明光者也。惟嵇叔夜能為此聲。自此以外，傳習數人而已。言訖，忽不見。敬伯自是琴理大進。」

賀道養

賀道養，山陰人。世以儒術顯，而道養工卜筮。經占驗若神。人以此之管輅。里中有好女子，工歌，無病忽死。道養為筮之，卦成笑曰：「此非死也，天帝召之歌耳。」諸人不信。道養乃取土塊加其心上，俄頃而蘇。其質之。女子云：「適為黃衣吏所召，至帝所，見庭懸方作樂，聞命歌，歌畢而返，殊無苦也。」諸人駭服。

宋齊梁陳 共十七人

光祿大夫孔靈產

孔靈產，山陰人。泰始中，罷晉安太守，有隱遁之志。於禹井山立館，事道精篤，頗解星文，好術數。齊高帝輔政，沈



攸之兵起，靈產白。高帝曰：攸之兵衆雖強，以天時冥數而觀，無能爲也。高帝驗其言，遷光祿大夫，以籠盛靈產。上靈臺，令其占候。餉靈產白羽扇，素隱几，曰：君有古人之風，故贈君以古人之服。當世榮之，子珪別有傳。

吳興令賀道力

賀道力，山陰人，善草書。尺牘尤美。王僧虔曰：賀道力書，垂丘道護述書賦云：道力草雄，圓轉不窮，壯自躬之體，格瘦逸少之流。通官終吳興令。

謝參軍善助

謝善助，山陰人，工書。爲湘東王府錄事參軍。初，齊末王勗圖古今雜體，有六十四書。湘東又遣沮陽令韋仲定爲九十一種善助增其九法，合成百體。其中以八卦書爲第一，以大小爲兩法。徑丈一字方寸，千言善助善飲酒，至數斗，醉後輒張眼大罵，雖復貴賤親疎，無所擇也。時謂之謝方眼。而胸襟夷坦，有士君子之操。

夏赤松

夏赤松，會稽人。文帝好碁，於時江左能碁人，瑯琊王抗第一品，吳郡褚思莊及赤松第二品。赤松思速，善於大



行思莊思遲巧於闢基又云抗神速思莊巧遲抗取勢赤松闢子

濮陽太守徐熙

徐熙錢塘人仕至濮陽太守熙好黃老隱於秦望山有道士過求飲留一葫蘆與之曰君子孫宜以道術救世當得二千石熙開之乃扁鵲人鏡經熙因精心學之遂名震海內

徐秋夫

徐秋夫熙之子善治疾宅在吳溝橋東夜聞空中呻吟聲甚苦秋夫問何須答言我東陽人姓斯名僧平昔為樂遊吏患腰痛死今在湖北雖為鬼苦亦如生為君善醫故來相告秋夫曰第女無形何由治鬼謂為芻人按孔穴鍼之秋夫如言為灸四處又鍼肩井三處設祭埋之明日見一人謝恩忽然不見當世服其通靈

蘭陵太守徐道度

杜道鞠范悅時褚欣遠褚胤附

徐道度秋夫子能精父業有脚疾不能行宋文帝令乘小輿入殿為諸皇子療疾無不奇驗仕至蘭陵太守同時有杜道鞠善彈碁范悅時褚欣遠皆善模書褚胤善



奕棋。宋文帝嘗曰：天下有五絕，而皆出於錢塘。并道度醫也。

徐常侍文伯

徐文伯，道度子，既精父業，兼有學行。高邁倜儻，耻屈意於公卿，不以醫自業。宋孝武路太后病，衆醫不識，文伯診之曰：此石搏小腸也，乃爲水劑消石湯，病卽愈。除郗陽王常侍，遺以千金。旬日，恩意隆重。宋明帝宮人患腰痛，牽心，每動輒氣欲絕。衆醫以爲肉瘕，文伯曰：此髮癥，以油投之，卽吐，得物如髮，稍引之，長三尺，頭已成蛇，能動，掛門上，滴盡一髮而已。病都差。宋後廢帝出樂遊苑門，逢一婦人有娠，帝亦善診，診之曰：此腹是女也。問文伯，文伯診之曰：腹有兩子，一男一女。男左邊青黑形小，於女帝性急，便欲使剖，文伯惻然曰：若刀斧，恐其變異，請鍼之，立落，便寫足太陰，補手陽明胎，便應鍼而落，兩兒相續出，如其言。

正員郎徐叔紹嗣伯

徐嗣伯，字叔紹，叔嚮子，秋夫孫也。有孝行，善清言。位正員郎，諸府佐，彌爲臨川王映所重。時直閣將軍房伯玉



服五石散十許劑無益更患冷夏日常複衣嗣伯爲診之日卿伏熱應瀕以水發之非冬月不可至十一月冰雪大盛令二人夾捉伯玉解衣坐石取冷水從頭澆之盡二十斛伯玉口噤氣絕家人啼哭請止嗣伯遣人執杖防閣敢有諫者搥之又盡水百斛伯玉始能動而見背上彭彭有氣俄而起坐曰熱不可忍乞冷飲嗣伯以水飲之一飲一升病都差自爾恒發熱冬月猶單禪衫體更肥壯嘗有老嫗患滯冷積年不差嗣伯爲診之曰此尸注也當取死人枕煮服之乃愈於是往古冢中取枕枕已一邊腐缺服之卽差又秣陵人張景年十五腹脹面黃衆醫不能療以問嗣伯嗣伯曰此石蛻爾極難療取死人枕煮之乃佳卽爲煮枕以湯授之得大利出蛻虫頭堅如石服五升卽差又沈僧翼患眼痛多見鬼物以問嗣伯嗣伯曰邪氣入肝可覓死人枕煮服之竟可埋枕於故處如其言又愈王晏問之曰三病不同皆用死人枕而差何也答曰尸注者鬼氣伏而未起故令人沉滯得死人枕投之魂氣飛越不得復附體故尸注可差石蛻者尸蛻也醫療旣僻蛻中轉堅世間藥不能



遣所以瀆鬼物驅之。然後可散。故令煮死人枕也。夫邪氣入肝。故使眼痛。而見魍魎。應瀆邪物以鈎之。故亦用死人枕。氣因枕去。故令埋於冢間也。又春日出南籬間。戲聞草屋中有呻吟聲。嗣伯曰。此病甚重。更二日不療。必死。乃往視。見一老姥。稱體痛。而處處有黥黑無數。嗣伯還煮斗餘湯。送令服之。服訖。痛勢愈甚。跳而投床者。無數。須臾。所黥處皆拔。出釘長寸許。以膏塗諸瘡口。三日而復。云此名釘疽也。

兗州刺史徐之才

徐之才。雄之子。文伯之孫。雄自有傳。在孝友之才。幼而儁發。善醫術。兼有機辯。少解天文。兼圖讖之學。有人患脚根腫痛。諸醫不能識之。才曰。蛤精疾也。由乘船入海。垂脚水中。病者曰。實曾如此。爲剖得蛤子二。大如榆莢。又有以骨爲刀把者。五色斑斕。之才曰。此人瘤也。問得處。云於古冢。見髑髏額骨長數寸。試削視。有文理。故用之。其明悟多通如此。之才醫術最高。時被命召。齊武成酒色過度。恍惚不恒。魯病發。自云。初見空中有五色物。稍近。變成一美婦人。去地數丈。亭亭而立。食頃。變成觀



世音之才曰此色欲太多虛所致卽處湯方服一劑便覺稍遠又服還變成五色物數劑湯疾竟愈帝每發動卽遣騎迎之鍼藥所加應時取効故頻有端執之舉入秋武成小定更不發動和士開欲依次轉進以之才爲兗州刺史及十月帝又病作語士開曰浪用之才外任使我辛苦其月八日勅驛追之才帝以十日崩之才十一日方到已無及矣

驃騎大將軍姚法衛僧坦

父菩提附

姚僧坦字法衛武康人吳太常信之八世孫也父菩提

梁高平令留心醫藥僧坦幼通洽仕梁爲太醫正武帝嘗因發熱服大黃快藥至尊年高不宜輕用帝弗從遂至危殆元帝有腹心疾諸用平藥僧坦曰脈洪實宜用大黃進湯果下宿食而愈金州刺史伊婁穆病自腰至臍似有三縛兩脚緩縱不復自持卽爲處湯三劑初服卽上縛解以次盡除卽爲合散一劑兩脚疼痺復緩曰霜降此患當愈旣而果然後仕至驃騎大將軍開府儀同三司封長壽縣公爲集驗方十二卷二子察最自有傳



智永

僧智永工書師七世祖逸少於永欣寺樓上積年學書業成方下有秃筆頭十麓麓盛五石人來覓書者如市戶限爲之穿穴乃用鐵葉裹之人遂稱其書爲鐵門限後取筆頭瘞之號退筆冢嘗寫真草千文八百本江南諸寺各留一本虞監云一字值五萬同時有智果亦工書結體瘦健隋煬帝甚善之嘗謂永師曰和尚得右軍肉智果得右軍骨

隋 共三人

舒綽

舒綽東陽人精地理家言時宰相楊恭仁欲遷葬會陰陽家五六輩皆海內知名恭仁未之決遣徵解者馳往取四隅土各一斗方面形勢悉書於曆密緘之恭仁出土示衆言人人殊獨綽定一土泚筆識之與恭仁所書之曆無毫髮差綽曰此土五尺外有五穀得其一卽是福地世爲公侯恭仁延綽至京掘地七尺得一穴如五石甕貯粟七八斗是地昔爲粟田蟻塚之人穴故然當時以綽爲聖



廷尉卿沈法朗僧昭

沈僧昭字法朗，吳興人。少事天師道士，常以甲子甲午日夜着黃冠，醮於私室，時說人吉凶，頗有應驗。自云為泰山錄事，幽司有所收錄，必僧昭署名。中年為山陰縣，梁武陵王紀為會稽太守，宴坐池亭，蛙鳴聒耳。王曰：殊廢絲竹之聽。僧昭咒厭十許口，便息。及日晚，王又曰：欲其復鳴。昭曰：王歡已闌，今恣汝鳴，即便喧聒。又嘗校獵中道而還，左右問其故，答曰：國邊有事，須還處分。問何以知之，曰：向聞南山虎嘯，知耳。俄而使至，復謂人曰：吾昔為幽司所使，實為煩碎，今已自解，乃開匣出黃紙書，上有一大字，字不可識。曰：教分判如此。及太清初，謂親知曰：明年海內喪亂，生靈十不存一，乃苦求東歸。既不獲許，及亂，百口皆殲，位止廷尉卿。

吳嶠

吳嶠，雲溪人，精於天文。袁天綱師事之。煬帝時嘗過鄴中，告其令曰：中星不守，太微主君有嫌，而王氣流萃於秦地，子知之乎？令不之信。卒之煬帝不返，而唐高祖起義太原，始知其言之不誣。



唐 共六人

沈七

沈七越州人善卜李丹員外謂之曰聞消息李侍郎知政事某又得給事中如何沈七云李侍郎即被追不得社日肉喫後此無祿公亦未改不得給事中其時去社纔十四日果有勅追李侍郎去社兩日而上道至汴卒李亦不得給事中如其言

陳昭

陳昭婺州人善姑布子卿之術僕射房瑄相國崔渙嘗貶歙睦州官昭見之云二公他日並為宰相然崔公為一大使來江左及至德初明皇入蜀房崔二公同時拜相崔後為選補使按行江東如昭言

徐惟嶽嶠之

父師道子浩孫璿峴附

徐嶠之字惟嶽會稽人父師道精於翰墨嶠之能世其學為人有氣節嘗面請張易之終洛州刺史正書入妙行書入能今閣帖所摹春首帖是洛州時書甚有大令恣態常書告身米元章曰唐官誥在世為徐嶠之體殊不俗子浩字季海少受筆法於父常書四十二幅屏風



八體皆備其朔風動秋草邊馬有歸心十數字草隸相  
叅皆爲精絕世狀其法曰怒猊抉石渴驥奔泉米元章  
曰浩書如蘊德之士今世所傳聖德感應碑頌是浩隸  
書述書賦云廣平之子令範之首姪姹鍾前逶迤王後  
浩古迹記末云臣長男壽臣自教授幼勤學書在於真  
行頗知筆法使定古迹亦勝常人又子峴亦工於行草  
石曼卿得其石刻屢稱於人四葉書名世罕其儷

辨才

僧辨才姓袁氏梁司空昂之孫智永之弟子也臨其師  
書逼真百家技藝悉造其妙寶愛蘭亭真迹太宗嘗求  
之不與用御史蕭翼賺得之遂命馮承素韓道政等各  
搨數本分賜皇太子諸王近臣而一時能書如歐虞褚  
諸公皆臨榻相尚後太宗不豫命太子以蘭亭從葬昭  
陵今馮承素輩所搨之本在者一本尚直錢數十萬

陳闕

陳闕會稽人善畫尤長於寫照開元中召入供奉每令  
寫御容妙絕當時嘗受詔寫太清宮肅宗像不惟得龍  
章鳳姿日角月宇之狀而筆力適潤風采英逸合符應



瑞天假其能。閻立本之後。一人而已。又嘗爲徐侍郎畫本行經幡二口。有女能織成妙絕。無並玄宗。令京兆韓幹師閻畫馬。唐畫斷云。陳閻貌之於前。韓幹繼之於後。寫渥涯之狀。不在水中。移驥裏之形。出於天上。韓故居神品。陳兼寫真。居妙品上。

孫處士位

孫位會稽處士。有道術。兼攻書畫。皆妙。得筆精。僖宗西幸之年。隨駕止蜀。曾於應天寺門左壁。画天王部從鬼神。奇恠筆勢。狂縱三十餘年。無有敵者。景煥其先。亦工

書畫。嘗與翰林歐陽學士。聯騎同遊。茲寺。偶画右壁。天王以對之。渤海某公。觀其逸勢。復作歌行一篇。以紀之。續有草書僧夢龜。後至。又請書之於廊壁上。書画歌行。一日而就。傾城人看。填咽寺中。成都號爲應天三絕。

五代 共三人

吳仁璧女

吳仁璧女。越人。少能詩。兼明玄象陰陽之學。天復中。仁璧登進士。居於家。甚貧困。間嘗佯狂乞於市。女曰。大人慎出入。恐罹網羅。已而錢武肅王命撰其母墓銘。仁璧



不從遂被繫女泣曰文星失位大人其不免乎遂併女  
沉之東小江女時年十八

陸晃

詹希雅附

陸晃嘉興人性踈逸善画多寫村野人物酒後遇筆揮  
灑略不預構時南唐李璟聞晃名欲召之人謂其嗜酒  
無人臣禮由是不召時同邑有詹希雅者妙於画竹亦  
工李後主金錯刀書有一筆三過之法雖若甚瘦而丰  
神有餘喜作荆檣荒野氣韻蕭疎多得其趣非圖画家  
繩墨所拘也

宋

共三十五人

書學博士孫景璠

孫景璠杭州水軍工於古文嘗篆千字文作五十餘體  
太平興國八年獻於朝太宗善之詔取去黥文隸御書  
院宰相宋琪請授以官太宗曰爵祿非所惜也顧此人  
面痕尚在豈稱冠帶乎琪固言之乃授國子書學博士  
王肇卿伋

王伋字肇卿一字孔彰其先汴人祖訥因議王朴金雞  
曆有差衆排之貶江西贛州因浪遊江湖愛龍泉山水



遂家於松源，攸生而穎悟，幼業舉子，不售，遂弃去。精管公明、郭景純地理之學，納交於何管鮑、張諸家，爲之卜葬，隨有何太宰管樞、密鮑置制、張諫議者出。卒後，門人葉叔亮傳其所著心經及問答語錄。范純仁跋之，略曰：先生通經博物，無媿古人，異乎太史公所謂陰陽家者矣。

吳傳朋說

吳說字傳朋，錢塘人，師禮子揚州布衣王逢原之甥。逢原有高名，爲王介甫所重，女嫁師禮而生說。善楷書，虞伯生稱其深穩端潤，非近世怒張筋脉屈折生柴之態。九里松字乃其所書也。阜陵嘗欲易之，御書至十數而卒，莫能及，遂命以金飾之。

李明甫

李明甫，東陽人，善醫，尤精鍼法。義烏令病心痛，垂死，明甫視之，曰：有虫在肺下，藥所不及，惟砭乃可。然非易也。謬謂於背上點穴，密取水以啜之，令方驚而鍼已入，曰：虫已死矣。旣而腹大痛，下黑水數升，虫亦去，遂愈。

毛會



方技  
卷之四十八  
毛會遂昌人工。畫人物得陸探微吳道子筆法。嘗遊廣仁院佛殿。潛畫一婦人乳嬰兒於壁間。每夜輒聞兒啼。衆皆恠之。一日會復至院。僧語及會。笑曰。若欲止啼。甚易。乃以筆添乳入口。自後啼聲遂絕。人以爲神筆。

### 釋仁

釋仁永嘉人。善画松。一夕夢看四百條龍。自是臻於神妙。每醉揮墨。醒後補之。形狀極於奇怪。嘗醉永嘉市。顧粉壁新圻。取拭盤帚濡墨。洒其上。來日略略點染。爲狂根枯枿。極槎枒輪困之勢。人伏其神。

### 進士盧碩父鴻

盧鴻字碩父。金華人。舉進士。善仙卜。鄉人周師銳既中。省問之。曰。當魁多士。且曰。熟讀程易師卦已。而廷對問師律之旨。遂爲武舉第一人。又善驅邪。有條桑者。忽墮地。嘔血死。鴻曰。行持可也。宜靜聽之。頃四山皆鬼。呌病者。忽呻吟。復嘔血數升而甦。

### 吳應能

吳應能龍泉人。奉靈官道士。雜用符水治病。輒愈。祈禳請禱。其應如響。崇寧中。上聞而嘉之。給驛召見。戲術甚。



奇上優寵命改奉靈官爲天寧萬壽之官御書額賜之仍賜號洞元妙應先生尸解賜葬隱真觀後

張司農卽之

張卽之蕭山人叅知政事孝伯之子以父蔭歷官司農丞授直秘閣致仕書名滿天下金人極愛重之懸餅金購募喜作摩窠大字不一時輒畫一幅絹尤工飛白自謂得中郎遺法

范復初疇

范疇字復初金華人得江西張九牛著易之占神妙莫測杭有無藉子胡婆壽負罪而逃官督責殊嚴捕者詣疇求筮卦成疇曰是去不遠可於北方樹木中索之如言迹至臨平果獲於空楊柳樹中遂繫獄後會赦出欲報疇持刀晨扣疇門給以買卜欲殺之疇決以占知將不利於已隔門語之曰欲問卜者可放下手中刀胡聞之駭服猶以刀劃其門而去疇由是避居吳門設肆賣卜疑者來問莫不神異

項彥升舉之

項彥升字舉之甫七歲爲遂昌紫極觀道士大觀庚寅



往汴京會九成宮金明池。因旱而涸，詔符召池中龍，舉之，挺劍結步池水，卽湧溢。有七巨魚浮水上，如北斗之次，雨隨霑足。詔改觀爲紫極壽光宮，賜殿額及田租。政和丁酉，召赴闕，授紫虛大夫，葆光殿校籍，爵秩視朝散大夫。

### 金紫良醫陳沂

陳沂，其先汴人。當唐乾寧時，有曰仕良者，以醫名於時。奉勅修聖惠方，流播海內。仕至尚藥局奉御。子孫遂世其業。建炎中，扈蹕而南，遂爲錢塘人。沂嘗治康王妃危疾，有竒効，賜御前羅扇。凡官中有疾，欲不時召之者，聽持扇入禁中。金吾闕寺不得沮止。仕至翰林金紫良醫。

### 大醫丞錢仲陽乙

父穎附

錢乙，字仲陽，吳越王俶支屬也。父穎善醫，然嗜酒喜游。一旦東之海上，不反。乙方三歲，母前死，姑嫁呂氏，哀而收養之。長，誨之醫，乃告以家世，卽泣請往跡尋父。凡八九反，積數歲，竟迎父以歸。時已三十年矣。鄉人重其孝，多賦詩詠之。其事呂如事父。呂沒，無嗣，爲收葬行服。乙始以顛顛方著名。至京師，視長公主女疾，有竒効，授翰



林醫學、皇子病瘵、癰、進黃土湯而愈、神宗召問黃土所以治疾狀、對曰、以土勝水、水得其平、則風自止、帝悅、擢太醫丞、賜金紫、由是公卿宗戚家、延致無虛日、廣親宗子病、診之曰、此可勿藥而愈、其幼在傍、指之曰、此且暴疾、驚人、後三日過午、可無恙、其家恚不答、明日、幼果發癰、甚急、召乙治之、三日愈、問其故、曰、火色直視、心與肝俱受邪、過午者、所用時當更也、王子病嘔泄、他醫與剛劑、加喘焉、乙曰、是本中熱、脾且傷、奈何復燥之、將不得前後洩、與之石膏湯、王不信、謝去、信宿寢劇、卒、如言而效、有士人病欬、而面青光、氣哽哽、乙曰、肝乘肺、此逆候也、若秋得之、可治、今春不可治、其人祈哀、強予藥、明日曰、吾藥再瀉肝而不少、却三補肺而益虛、又加唇白法、當三日死、今尚能粥、當過期、居五日而絕、又乳婦因悸而病、既愈、目張不得瞑、乙曰、養郁、李酒飲之、使醉、卽愈、所以然者、目系內連肝、膽恐則氣結、膽衡不下、郁李能去結、隨酒入膽、結去、膽下、則目能瞑矣、飲之、果驗、乙本有羸疾、每自以意治之、而後甚、歎曰、此所謂周痺也、入臟者死、吾其已夫、既而曰、吾能移之、使在未、因自製藥



日夜飲之、左手足忽攣不能用、喜曰、可矣、使人登東山、得茯苓大如斗、以法啖之、盡、由是雖偏廢而風骨悍堅、如全人以病免歸、不復出、乙爲方、不名一師於書、無不窺、不靳靳守古法、時度越縱捨、卒與法會、尤邃本草、諸書辯正缺誤、或得異藥、問之、必爲言、生出本末物色、名貌差別之詳、退而考之、皆合、末年攣痺寢劇、知不可爲、召親戚訣別、易衣待盡、遂卒、年八十二、

### 韓慥

韓慥臨安人、精於星卜、多奇中、紹興庚辰春、曾侍郎仲

躬暨呂太史伯恭至其肆、則先一人在焉、問其姓、宗子也、次第講命、首言趙可至郡守、却多貴子、不達者亦卿郎、次及曾則曰、命甚佳、有家世、有文學、有政事、亦有官職、只欠一事、終身無科第、次至呂、問何幹至此、呂曰、赴試曰、去年不合發解、今安得省試、曰、赴詞科、曰、却是詞科人、但不在今年、詞科別有人矣、後三年、兩試皆得之、且不失甲科、叩其何所至、沉吟良久曰、名滿天下、可惜無福、已而其言皆驗、趙名待仕、至岳州守、其子汝述爲尚書、迺達、遇皆卿監郎、曾名遠、吉甫文清公之子、能世



其家舉進士不第。至從官以沒。呂太史隆興癸未諒陰榜南宮第七人。又中宏詞科。爲儒宗。不幸得末疾。甫四十六歲而卒。其術之神驗如此。

宋彥誠棣

宋棣字彥誠。鄞人。初本江南士子。靖康初。携家逃難。行抵明越之界。萬山嵯峩。望一石室。壁立千仞。規舍其中。忽有老父曰。此聖公岩也。神人居之上。每有金鼓聲。毒蛇猛獸守其窟。不可往也。棣曰。吾止平地而遇寇。必無幸者。匿此中。未必死。於是弃擔持糲。緣崖魚貫而進。居旬有五日。絕無可怖者。而岡領秀出。泉石清泚。真仙靈所居。望岩竇數有異光。疑之。因梯竹以上。得一石匣。緘鏽甚固。一劍橫其外。啟之中。有書與印。言役鬼神治病之術。寇退。奉之以去。設壇而事之。自是役鬼神如反掌。最異者能追魂診脈。人有病妻。則診其夫。父則診其子。有祟。則以法治之。無祟。吞符亦安。合沙鄭瓚嘗伺其作法。往觀焉。見其據案而坐。運指於袖。嚙水於口。以桃茆麾使。而鬼神自至。訊鞫論報。若官府。然問曰。此何法也。棣曰。非法也。周天大數也。大衍所謂成變化而行鬼神也。



成變化者數之方也。行鬼神者數之圓也。棣妻戴氏妊幼子，神降於奉化張氏，言上帝使續棣法。某日則生，戴亦夢一道士，頰有珠，曰：上帝使爲而子代天行法。俄入於懷，如期不血而生。鄭瓚據其實記之。

王彥昭克明

王克明字彥昭，其先饒州樂平人，後徙居湖州，遂占籍爲烏程人。初生，乏乳，母餌以粥，遂得脾胃疾，長益甚，醫以爲不可治。克明自讀難經素問，以求其法，刻意處藥，其病乃愈。始以術行江淮間，入蕪湖，鍼灸尤精。診脈有難療者，必沉思得其要，然後予之藥。病雖數證，或用一藥以除其本，本除而餘病自去，亦有不予藥者。期以某日自安，有以爲非藥之故，過在某事，當隨其事治之。言無不驗。士大夫皆自屈與游。魏安行妻風痿十年不起，克明施鍼而步履如初。胡秉妻病內秘腹脹，號呼逾旬，克明視之，時秉家方會食，克明日：吾愈恭人病，使預會可乎？以半碗圓碾生薑調乳香下之，俄起對食如平常。廬州守王安道風禁不語旬日，他醫莫知所爲，克明令灸炭燒地，洒藥置安道於上，須臾而蘇。金使黑鹿谷過



姑蘇病傷寒垂死克明治之明日愈及從徐度聘金黑鹿谷適爲先排使待克明厚甚克明訝之谷乃道其故由是名聞北方後再從呂正巳使金金接伴使忽被危疾克明立起之却其謝張子蓋救海州戰士大疫克明時在軍中全活者幾萬人子蓋上其功克明力辭之克明頗知書好俠尚義常數千里赴人之急初試禮部中選累任醫官後遷額內翰林醫痊局賜金紫紹興五年卒年六十有七

工部侍郎馬和之

馬和之錢塘人紹興中登第善畫人物山水筆法飄逸務在華滋自成一家高孝兩朝深重其画毛詩三百篇每篇俱画一圖官至工部侍郎

邢氏

邢氏紹熙間以醫名於杭術業甚奇時韓侂胄知閣門將出使俾之診脉曰和平無可言所可憂者夫人耳知閣回輅日恐未必可相見也韓妻本無疾惟其妄誕不倫然私憂之洎出疆甫數月而其妻果報卒矣朱勝非子婦偶小疾命視之邢曰小疾爾不藥亦愈然不宜孕



孕必死其家以爲狂言。後一歲朱婦得男其家方有抱孫之喜未彌月而婦疾作急召之堅不肯來曰去歲已嘗言之勢無可療之理越宿而婦果卒。

### 富春子孫守榮

孫守榮富春人生七歲病瞽遇異人教以風角鳥占之術其法以音律推五數播五行測度萬物始終盛衰之理凡問者一食頃輒知休咎守榮旣悟異人授以鐵笛遂去不復見守榮因號富春子吹笛於市中市中人初不異也然其術率驗周坦未第時坐市肆厲聲詬僕榮揖曰狀元何怒也坦不答後果廷試第一嘗寓廣陵造者如市有人於稠伍中伸一臂與之守榮執其手曰龔朝奉別十年何乃抵此衆皆驚歎蓋一揣其骨終身不忘其或持金玉請辨其色摩娑之頃美惡立判寶慶間游吳興聞樵樓鼓角聲驚曰旦夕且有變土人當有典郡者適見里人王元春因賀之曰旦夕鄉郡之除必君也元春初不之信越兩月潘丙作亂王果以告變之功典郡自是富春子之名大顯淮南帥李魯伯薦諸朝旣至謁丞相史嵩之闈者以晝寢辭守榮曰丞相方釣魚



園池焉得云爾。聞者驚異，入白丞相。丞相一見，頗喜之。自是出入相門，一日庭鵲噪，令占之曰：來日晡時當有寶物至。明日李全果以王柱斧為貢，嵩之又嘗得李全書藏袖中，詢其事。守榮曰：此李全詐假布囊三十萬，爾剝封果如其說。士大夫咸詢履歷，守榮不盡答。私謂所知曰：吾以音推諸朝紳，互有羸縮，宋祿其殆終乎。史以此深忌之，誣以他罪，貶死遠郡。

耿聽聲

耿聽聲，亡其名，錢塘人。以聲音占，故稱聽聲。然兼能嗅衣物，以知吉凶貴賤。德壽聞其名，取官人扇百餘，雜以上及中官所御，令小黃門持叩之。耿嗅中官扇云：此聖人也。然有陰氣至上，扇乃呼萬歲。上奇之，呼入北宮，又取妃嬪珠冠十數示之，至一冠，奏云：此有尸氣。時張貴妃薨，此其故物也。夏震微時，嘗為殿岩餽酒於耿耿，聞其聲，知其必貴，遂以女妻其子。復時郭棣為殿帥，耿謁之曰：君部中有三節度使，他日皆為三衙，扣為何人，則曰：周虎、彭輅、夏震也。虎輅時皆為將官，獨震方為帳前佩印官。郭曰：周彭地步或未可知，震安得遽爾乎。耿曰：



吾所見如此可必也已而悉驗人皆服其先見

畫院待詔林椿

林椿錢塘人工畫花鳥翎毛瓜果傳色輕淡深得造化之妙淳熙中畫院待詔賜金帶

進士錢舜舉選

錢選字舜舉烏程人舉進士善詩畫尤工花卉設色有嫣然之態論者以錢舜舉畫趙子昂字馮應科筆為典三絕

劉松年

劉松年錢塘人紹熙間待詔畫院師郭禮工畫人物山水神氣精神名過於師寧宗朝進耕織圖稱旨賜金帶院畫中絕品也

畫院待詔李嵩

從子永年附

李嵩錢塘人李從訓養子工畫山水人物道釋得從訓遺意尤長於界畫光寧理三朝待詔畫院從子永年能世其學

待詔夏禹玉珪

子森附

夏珪字禹玉錢塘人寧宗朝待詔賜金帶善畫人物醜



方技 卷之四十八  
釀墨色如傅粉筆法蒼老墨汁淋漓雪景學范寬院中人畫山水自李唐以下無出其右者子森亦工山水

画院祇候樓觀

馬遠遠子麟附

樓觀錢塘人工画花鳥人物山水得夏珪筆法傅色亦絕似之咸淳間画院祇候與馬遠齊名馬遠其先河中人後居錢塘工山水人物花鳥種種臻妙獨步画院光寧朝授待詔子麟能世家學然不逮父遠愛其子多於已画上題作麟画盖欲麟得譽故也亦爲画院祇候

夏巨源

夏巨源精卜筮居臨安中瓦紹熙間有自贛造朝而遺其文劄者卜之夏爲作食堯二字且曰獲在多口守以鴛鴦無虞也其人莫識所謂旣而僕從饒州持所遺至果妾福安收藏鴛鴦字篋中始服其神術

羅子敬知悌

羅知悌字子敬錢塘人明辨博學以醫侍穆陵甚見寵遇宋亡隱居頗自尊貴少與人接丹溪朱彥修素志醫學徧歷江湖淮甸不遇明者還至武林遇知悌俟門下三載始得見知悌念其誠盡以其術授之彥修遂以醫



名東南。知悌能詞章。善揮翰。貧病無告。予之藥。無不愈者。仍贍以調理之資。

嵇仁伯清

嵇清字仁伯。世傳秘術。善療金瘡骨損。初父由汴扈蹕南渡。時方戎馬蹂躪。全活甚眾。及北虜入寇。帥臣請俱值兵潰。因失所在。事聞。命清攝職。年未冠。蚤諳先業。已而宮中有折肱者。他醫莫措。清為整治完好。如昔。禁掖詫曰。小小嵇真能接骨邪。壽皇躬親騎射。時有誤損。應期而瘳。中外益重之。先是大江以南。良醫故鮮。正骨一

科。尤所罕覩。清既著名。日有扶疾就視者。續斷起廢。屢見奇效。

趙必復初暘

趙初暘字必復。縉雲人。生而神異。右掌有雷使。二紅字。學道術。能役鬼神。治疾無不愈。歲旱。呼吸可致雷雨。時令小兒伸掌。書一雷字。握之。開手則雷鳴。兼能辟邪。嘗賣雨於臨安市。墨汁咒符。雨點皆黑。人皆稱為趙雷使。

先生

李立之

李立之。安人。少時。小兒醫。...



李立之臨安人在宋以小兒醫擅名一時有嬰兒忽患瘡求治立之令以衾裹兒乘高投之地兒不覺大驚遂發聲能言問之曰此乳搐心也非藥石所能療其術之高。大率如此。

毛存

毛存杭州人父伯益坐韓侂胄黨流嶺表卒跋涉千里。函骨歸葬人稱篤孝善墨竹水石如楊中齋裴德游諸人皆宗之。

毛梓孫

毛梓孫松陽人好軒岐家術受業於顧希武時御史吳叔潤病瘠環醫無措梓孫投一劑立愈程恩與病惡寒已易箒梓孫曰是尚可生也使掘竅置火設續令卧其上覆以重衾用釜煮藥蒸之未幾病者蹶然起坐其神異多類此人以神醫目之邑令洪斌序其事。

元 共二十四人

張德元

張德元不知何許人元初嘗為諸暨州吏且避亂居山陰有奇術善觀字知吉凶生一子名之曰槐忽謂友人



是兒必死。槐字木傍鬼，非死兆邪。未幾見果卒，其友病以豐字示之。德元曰：死矣。明日訃至，或問其故。德元曰：豐字山墓所也。兩丰封樹也。豆祭器也。墓既成矣，尚欲生乎。徐總制書字問德元。德元曰：據字。今夕君當納寵。徐歸，其夫人呼一婦人出拜，乃乳媪也。嘗飲劉彥昭家。曰：今夕復有客，已而客至，問之。德元曰：吾聞滌器聲，故知耳。

馮道助

馮道助，山陰人，善幻術。凡里中犬噬人者，道助指之，則狂獠以死。有村夫板築道側，見行者偶妨其業，則詈之。道助摘草置其上，已而所築連堵皆潰。三江戍卒侮之，遜謝不與較，但引之坐石橋上。道助既去，戍卒踰時不能起。道助行三十里許，摘草與樵者，曰：某橋上有戍卒，數人可以此草與之。樵夫如言，戍卒始能去。嘗至丁墟，呼農夫渡，不得遂。幻雙鯉躍田中，見者取鯉，禾盡蹂躪。又嘗暑行至顧埭，乞瓜於圃人，弗與。蔓中忽走一白兔，行者爭逐之。瓜蔓亦盡傷。後符籙事發覺，有司遣人往捕，適與捕者遇於途，取捕者公牒去，而捕者忽然不見。



後不知其所終。

### 陳宗山

陳宗山平陽人少穎悟及長究心曆數遍遊江湖未得其要及歸欲受業於陳時敏時時敏卒得遺書研精覃思得不傳之妙於文字間時敏之徒所推曆多有舛訛宗山校正之十數年言曆者皆推宗山

### 鮑原禮敬

鮑敬字原禮山陰人善畫人物亦善花木禽魚嘗爲人畫牡丹恣態天然牛效李廸

### 楊子固維翰

楊維翰字子固諸暨人維禎之從兄善水墨蘭竹爲柯九思所推

### 張夢庚

張夢庚松陽人遇異人授易元末召居將幕推步有驗後復垂簾於市賣卜一日有葉姓者無子多娶妾求卜庚以詩二句授之曰不是桃花貪結子更教人恨五更蜂持歸謂此老風字且不識何談理數乎其人奉蜂數十筒一旦蜂逸冒而收之忽集其面螫而死人以爲神



劉資深 戴帽附

劉資深永嘉人。世精醫學。元初郡大疫。太守肩輿迎之。所療應手而愈。與戴帽齊名。帽曾治謝后異疾。立愈。后喜。詢其家世。知爲少師文端公溪之孫。以姪女妻之。宋祚移。耻事二姓。遂隱去。

黃子久公望

黃公望字子久。富陽人。聰敏絕倫。通百氏說。尤工。畫山水。運思落筆。氣運流動。畫家有極力不能追者。每擬其爲僊人。得其片紙。皆寶之。至元中。浙西廉訪使徐琰辟爲書佐。未幾棄去。更名堅。號一峯。又自稱大癡道人。放浪江湖。年八十餘卒。

吳先生

吳先生不知其名。或云崇德人。善易筮。日惟一課。得錢米衣肉共置一窟中。時爲人竊去。不問也。無錫戴士先母病。攣不能行。七八年矣。百計求愈。疾不驗。士先歸。過崇德。携百錢訪之。吳曰。觀君寒士。百錢豈易無用許。自爲筮。卦成。曰。當得有道之士治之。則可。姑蘓杲道人。不爲勢利所誘。君純孝。往敬求。必如志。士先抵蘓。五旬果



逢杲道人。士先語其故，拜懇之。道人欣然，至無錫，爲戴母胗視，數日，卽能移步。母拔金釵謝之，笑曰：「且寄夫人處，他時要卽取之，但館我於外足矣。」館之歲餘，忽言曰：「我且死，幸鬻所寄釵以辦棺窆，明日果死。」戴氏奉其教，及將窆中，已空空矣。異蓋異人也。鄉人至今能言之。

### 秦州知州王叔明蒙

王蒙字叔明，仁和人，家住黃雀山，故號黃雀山人。趙子昂甥也。仕至秦州知州，能詩善畫。畫學董巨，源得用墨法，秀潤可愛，亦善人物，瀟灑文雅。平生無絹畫，惟於紙上作之，其得意之筆，常用數家皴法。山水多至數十重，樹木每画數十樣，峯巒重疊，徑路迂迴，林木叢茂，烟霧微茫，曲盡山林幽致。坐對其画，恍若在名山勝水間也。賞鑒家評其所作，當爲元画中第一。今片紙遺墨，人不吝數十金收之。

### 金一之應桂

金應桂字一之，錢塘人。儼宋爲縣令，宋亡，隱居風篁嶺，書法歐陽率更，画學李龍眠，俱入能品。性高亢，不輕爲人下筆，故傳世者絕少。



吳孟思睿

吳睿字孟思杭人居崑山工翰墨精篆隸遠近慕之出輒為好事者邀止止或彌月為人外和內介所交多達官而絕無求薦意士紳以此嚴重之卒於崑山

陳仲美琳

陳琳字仲美錢塘人善山水人物花鳥俱師古人無不臻妙臨摹古画咄咄逼真蓋趙魏公相與講明多所資益故其画不俗論者謂宋南渡二百年工人無此筆也

馮道君

馮君道錢塘人画花竹翎毛性酷嗜鶴鶉常袖籠之觀其飲啄以資画笔

王思善繹

王思善繹字思善自號痴絕其先睦人後居杭之新門篤志好學雅有才思在諸生中年十二三已能丹青亦善寫貌繼得吳中顧周道開發不徒得其形似亦且得其神氣画家人多稱之

承應法師陳可復

陳可復定海人生而踈爽丰骨不凡有林生善役雷恣



酒自喜，有問其法，輒斥去。可復晝夜承事，林嗜酒，每鬻衣以奉，繇是卒得其術。至元中，鄉大旱，禱禴莫應，有戲之曰：「陳道士能召雷。」命至官庭，將候其不驗，侮辱之。可復以法，與雲、雨、風、雷、電大作，雨甚，雷足，嘗主教郵之。玄妙觀時值中秋，有方士寓觀，賞月，可復不預戲，以墨水噴符，頃卽烏雲掩月，而雨黑，雨坐客驚散，衣盡緇矣。衆知其所爲，延之入席，雲霧盡散，月復朗然，其響應神速，皆此類也。旣而名聞京師，召爲承應法師，世祖偉其貌，命治足疾，可復曰：「疾深不可除，臣有禁架術，願試之。」試之，良愈，復命止風，風返却，祈雪，雪立至，從上巡幸，幾十年，卒京師，追封爲誠明翊教太極真人。

王若水淵

王淵字若水，錢塘人。幼學丹青，趙文敏公以画傾一時，淵得與之游，故傅色特妙。天曆中，画集慶龍翔寺兩廡，壁高三丈餘，難於着筆，時都下劉絕管命於門上画二鬼，淵粘紙画之，劉曰：「其如手足長短何？」若水不得其理，因再拜求教，劉曰：「但先配定尺寸，画爲裸體，然後加以衣冠，則不差矣。」若水依法爲之，果善。筆法皆師古人，無



一筆院體山水花鳥人物。一。精妙。至於水墨花鳥竹石尤絕藝也。

錢九五

錢九五淳安人。居蜀阜。幼習五雷天心正法。採樵山中。有雷部神爲孕婦所魘。九五爲之解釋。始得上昇。因授以呼雷法。嘗求桑於江村人。弗得。遂書江村風拔木數字焚之。須臾大風盡拔其木。時縣苦旱。尹俾祈雨。應禱而降。遂往龍虎山受籙。道逢二老對奕。啖以數果。精爽倍常。命拔一松。倒種之。誓曰。此松活。則法可傳。九五乃往。及回。則二老猶在。而松固無恙也。授以四石子。戒以勿啓。頃之。石子錚錚有聲。啓之。則雙蝶颺去。僅存其二。自後有二神人呵護之。一日。聞張天師至。九五方飲酒。戲以栗壳置杯中。咒之。天師舟不得發。詢故致謝。乃得上。後如廁。失持溷籌。呼帥將。則籌如蝟集。而神亦不復至矣。今所居法水井猶存。

僧若芬

仁濟附

僧若芬字仲石。婺州曹氏子。爲上竺寺書記。摹寫雲山。以寓意。求者漸衆。然若芬不以之自矜。嘗曰。錢塘八月。



潮西湖雪後諸峯極天下偉觀。二三子當面蹉過却求玩道人數點殘墨何邪。歸山家古澗側蒼壁間占勝作菴。扁曰玉澗。因以爲號。又建閣對芙蓉峯。號芙蓉峯主。嘗自題画竹云。不是老僧親寫。曉來誰報平安。其意趣可想也。其甥法名仁濟。亦出家。上竺書學。蘓東坡竹學。俞子清梅學。楊補之。自謂用心四十年。作花園稍圓耳。

孤雲處士王振鵬

王振鵬永嘉人。工画山水人物。尤精界畫。文宗詔畫殿壁。稱旨。欲官之。不受。賜號孤雲居士。時人重其品。爭購其畫。以幣交者。屢錯戶外。而苟非其人。未嘗輕點一筆。近世所傳春明奪標圖。極精。與清明上河圖同價。嘗奉詔作十妃冊。藏之內府。楊文正公忽於燕市中得之。以爲一段奇事。什襲而題。其後以爲子孫世寶。其爲鉅公所重如此。

莫起炎月鷗

莫月鷗名起炎。歸安人。幼習舉子業。三試有司不利。乃着道士服。更號月鷗。入青城山。見徐無極。授五雷法。用是召雷雨。破鬼魅。動無不驗。雖嬉笑怒罵。皆若有神物。



隨之者。元世祖遣御史中丞崔或求異人於江南得之。  
其賚優厚。卒年六十九。宋濂爲之傳。

抱一翁項彥章昕

項昕字彥章。世居東嘉。今徙越江。自號抱一翁。自幼聰  
敏。好方數。外大父世業醫。奉父命。謁受其書。讀之。年未  
成童。已諳誦岐扁素難。王叔和脉經。稍長。學易。趙穆仲  
葉見山所。後以母病。醫誤。投藥死。痛之。乃益勵志醫術。  
欲盡受他禁方。聞越大儒韓明善先生。爲方善也。遂往  
拜之。盡得所藏方論甚富。後更謁陳白雲。受五診奇眩。

歷試其說皆精。會金華朱彥修來越。出金源劉河間張  
戴人李東垣諸書示之。昕獨疑古方不宜治今病之論。  
亟往錢塘。見陸簡靜叩之。始悟古今方同一矩度也。後  
又往浙右。見葛可久論劉張之學。又往建業。見劉全父  
爲撰五運六氣諸篇授昕。太醫使張廷玉善橋引几案  
甚奇。非世之所聞也。昕亦得見事之。盡其技。於是爲人  
治診病。決死生。無不立驗。其於爲醫。或在杭。或在鄞。或  
在閩。在杭爲府史。爲肅政府書吏。在鄞爲帥府令史。在  
閩掾行中書掾行臺。一皆以醫見辟諸貴人。而非所尚。



也。然庶謹練達之風，雖素業吏事，卓卓當時者，亦皆自謂不能及。所偉儀觀，美鬚髯，雙目爛爛如電光。天性純孝，父母有疾，扶持保抱，不解帶者旬朔。沒則一遵儀禮，治其喪，平居樂易寬厚，務揚人善而耻言人過。與人交，必盡其誠，平生喜詞章，善真律，工繪畫，而獨以醫顯。所著書有竹齋小稿及脾胃後論，別誤醫原若干卷，議論宏贍，未及成，子恕能世其業。

兩浙名賢錄卷之四十八終



